

清史列傳

冊六





清史列傳 卷六

大臣畫一傳檔正編二

郎球

郎球姓覺羅氏滿洲正藍旗人景祖翼皇帝第三兄索長阿之曾孫也初任理事官兼護軍參領天聰三年從太宗文皇帝征明燕京以中途逗遛罰鍰奪所俘獲九年大軍征明廣寧郎球同參領圖賴等率兵四百先趨錦州有斬獲功擢刑部承政兼護軍統領進列議政大臣崇德三年睿親王多爾袞征明上親帥諸王送之豫親王多鐸不至詔禁王不得出府門是時郎球爲豫親王屬下上因怒曰朕屢諭郎球王若有過爾當諫諍乃竟諂媚逢迎見王怠玩如此不行規正可速執之既而上命豫親王同大軍赴山海關牽制明寧遠錦州援兵諭諸王貝勒大臣曰多鐸等前罪姑俟班師後議郎球出任職如初會豫親王軍行失律上欲申飭其罪命郎球召王郎球違命不往詔解任下廷議並論前罪明年五月王大臣等以郎球瞻徇隱默復藐視上命罪應死籍沒奏聞得旨從寬革世職罷任六年隨



征錦州與副都統星訥擊敗松山援兵登山克敵又與參領鼇拜敗敵步兵論功抵前罪復任參領命率護軍助內大臣錫翰等設伏高橋擊敗杏山邏兵追至塔山斬獲甚衆七年授禮部參政旋擢承政順治元年世祖章皇帝定鼎燕京耶球任禮部尙書贊定郊廟大典二年授騎都尉世職三年隨順承郡王勒克德渾征湖廣流賊師至石首縣偵知賊欲渡江攻荊州大軍進擊耶球先率兵趨江濱斷賊後路取賊船千餘賊自荊州敗還不得渡悉爲大軍斬獲四年六月考滿晉三等輕車都尉六年授本旗都統兼禮部尙書七年四月調刑部尙書先是五年九月鄭親王濟爾哈朗統兵之長沙耶球署副都統以隨至是凱還得優賚八年正月英親王阿濟格有罪耶球坐徇隱罷任削世職籍家產之半明年三月復授禮部尙書十月列議政大臣十一年加太子太保尋加少保兼太子太保調戶部尙書十三年五月以員外郎朱世德虧缺權稅戶部援恩詔請豁部臣均坐徇庇耶球削少保解任康熙五年二月卒年七十有三賜祭葬如例

斐雅思哈

斐雅思哈滿洲正黃旗人姓富察氏佐領木科里之第三子也初任護軍校天聰

六年太宗文皇帝親征察哈爾分兵略明大同至朔州城中兵出戰斐雅思哈與參領道喇等奮擊敗之崇德三年署護軍參領隨貝勒岳託征明入牆子嶺敗密雲步兵五年大軍圍錦州明兵至松山杏山赴援斐雅思哈禦戰皆捷六年復圍錦州同參領哈寧阿擊敵城下射殪二人明總督洪承疇以步隊自松山來犯斐雅思哈力戰卻敵世祖章皇帝順治元年隨睿親王多爾袞入山海關敗流賊李自成又追敗之於望都是年冬授護軍參領隨英親王阿濟格剿自成明年春次榆林賊乘夜襲我營斐雅思哈同護軍統領車爾布等擊走之窮追自成至武昌連破賊營復率舟師敗賊於富池口獲賊船三十三年隨肅親王豪格征流賊張獻忠過西安分兵剿賊邠州賊渠胡敬德率衆千餘踞三水縣西北山岡斐雅思哈同護軍統領噶達渾破賊寨復同都統巴哈納擊敗叛鎮賀珍於鷄頭關進師四川屢與獻忠賊黨戰斬獲無算正藍旗官軍爲賊所困同噶達渾趨援賊敗遁先是敍入關功予世職騎都尉及獻忠滅加一雲騎尉六年隨英親王討大同叛鎮姜瓖掘壕圍城僞總兵楊振威率步騎萬餘來犯斐雅思哈先衆迎戰卻賊入城時賊黨分踞左衛復陷汾州窺太原斐雅思哈先後率護軍剿賊所至克捷尋

復會大軍圍大同賊勢蹙振威斬壤首出降乃班師三遇恩詔晉世職一等輕車都尉十三年擢護軍統領列議政大臣尋率兵赴湖南駐防時獻忠餘黨孫可望踞辰州斐雅思哈同都統卓羅副都統泰什哈等由澧州常德進征賊棄城遁縱火焚其船以阻我軍斐雅思哈取其未及焚者以濟師攻發賊伏躡擊至瀘溪殲賊甚衆十八年隨定西將軍愛星阿剿明桂王朱由榔於緬甸緬人執由榔以獻聖祖仁皇帝康熙元年凱旋敘功晉爵三等男十一年五月卒賜祭葬如典禮諡僖恪子蘇丹襲爵

巴山子舒恕

巴山滿洲鑲黃旗人姓瓜爾佳氏世居哈達祖巴岱國初時率衆來歸授佐領再傳至巴山仍其任天聰五年從太宗文皇帝征明圍大凌河城明兵出城誘戰副都統屯布祿戰歿巴山衝入敵陣得其屍以出復擊退敵兵取佐領郎格等二人屍歸明年大兵征察哈爾其部衆有竄入明大邊境者往索取之師旋明兵追襲巴山與承政圖爾格殿後設伏邀擊斬馘甚衆八年以克副任使授騎都尉世職尋任參領崇德元年從上征朝鮮同參領屯泰等先衆破敵陣三年七月兼任

工部理事官八月隨貝勒岳託征明白牆子嶺入邊薄燕京擊敗明太監馮永盛  
兵進攻鉅鹿縣率所部樹雲梯先登克其城敍功加一雲騎尉五年同承政薩穆  
什喀索海等征虎爾哈部攻掛喇爾屯有斬獲七年奉命隨奉國將軍巴布泰率  
師駐防錦州世祖章皇帝順治元年睿親王多爾袞統大兵入山海關巴山率所  
部步戰擊敗流賊李自成尋擢工部侍郎敍功晉三等輕車都尉二年十一月授  
鎮守江寧副都統三年命總管江寧駐防滿洲兵時江北山寨賊寇未靖江寧城  
中奸徒謀爲內應巴山偵得之捕斬逆黨三十人未幾僞潞安王朱誼石糾衆二  
萬餘分三路來犯巴山與副都統康喀賴等破走之賊復屯聚城北之攝山我軍  
進剿斬其渠數人餘黨悉潰竄四年明故官侯峒曾之子侯元澣遣其黨謝堯文  
潛通明魯王朱以海於海島取僞敕及僞鎮黃斌卿致招撫大學士洪承疇書以  
歸爲柘林遊擊陳可所獲有內伏承疇殺巴張二將語蓋指巴山與提督張大猷  
也事聞上以逆書所云乃反間計特宣諭慰承疇而諭獎巴山張大猷曰爾等嚴  
察亂萌具見公忠盡職六年江南總督馬國柱剿六安州山賊巴山以兵會之陣  
斬賊渠張福寰諸賊寨俱翦平兩遇恩詔晉爵三等男九年還京十一年以久鎮

江寧平賊寇功晉二等男康熙十二年卒賜祭葬如例以其子舒恕襲爵十五年舒恕隨大學士圖海征叛鎮王輔臣師至平涼北城虎山墩輔臣以衆萬餘拒敵敗之是年復隨都統穆占征逆藩吳三桂破賊衆三千於湖北松滋縣二十年進圍雲南城擊敗賊將胡國柄劉圮龍黃明等又蹙賊將馬寶巴養元等於烏木山二十五年敘功晉一等男後以年老乞休尋卒子長清改襲一等輕車都尉

星訥

星訥滿洲正白旗人姓覺爾察氏初爲二等侍衛兼佐領從太祖高皇帝征明遇蒙古兵四百於塔山之北射其渠魁殪之遂敗其衆天聰七年太宗文皇帝命與參領蘇爾東阿等率兵三百駐守遼河先是我師征察哈爾星訥以二十人往張家口偵敵猝遇敵兵禦守四日夜俟貝勒阿濟格至請兵二百攻克之察哈爾部多爾濟塔蘇爾海倚山立寨列火器拒守星訥率護軍先登敵衆奔潰八年上統大軍征察哈爾星訥隨額駙布顏代率蒙古兵進哈麻爾嶺遇其部俄爾塞圖等率所屬戶口來歸納之以聞時察哈爾林丹汗西奔土默特其下相率歸順上乃移師征明星訥同前鋒參領席特庫等略大同明將自龍門率兵三千逆戰星訥



擊之敗北斬獲甚衆論功予雲騎尉世職尋授刑部參政崇德三年同承政葉克舒征黑龍江奏捷敘功並以其兄辛泰弟西爾圖陣亡應得世職令併襲之晉三等輕車都尉參政吉恩哈有女爲雅什塔子婦新寡吉恩哈疾女歸省星訥之子阿思哈見而謀娶之雅什塔訟於所司論罪星訥應革世職罰鍰降理事官上命降罰如議免革世職四年授護軍參領兼議政大臣尋遷副都統六年二月授工部參政三月隨鄭親王濟爾哈朗圍錦州明總督洪承疇親以兵六萬赴援屯松山北岡星訥先登破其壁壘明援兵繼至星訥屢擊敗之七年敗明總兵吳三桂白廣恩等兵於高橋八年擢工部承政世祖章皇帝順治元年隨睿親王多爾袞入山海關擊流賊李自成以步兵破賊陣是年改六部承政曰尙書星訥仍任工部二年敘功授一等輕車都尉三年隨肅親王豪格師抵西安分剿賊於邠州賊潰遁進趨秦州賊將高汝礪率步騎迎拒大敗之與肅親王會師川中屢敗賊渠張獻忠兵凱旋晉太子少師加一雲騎尉六年逆鎮姜瓖據大同叛星訥隨大兵討之圍其城賊填塹毀垣簡驍勇蒙盾突犯星訥率將士持短兵力戰卻賊賊背城爲陣復以火器來攻星訥親督精銳馳壓其營大兵乘之賊兵不能支殲其勁

兵略盡七年遇恩詔晉爵二等男八年都統額克青等舉發英親王阿濟格令其子勞親以兵衆迎睿親王喪謀干政法司翰議星訥隸王屬下雖未與謀第不卽奏劾且爲王趣召勞親應罷尙書任又議其在工部擅撤昭陵工役五百人及不補植陵樹罪革世職籍家產半九月復任工部尙書列議政大臣十年上以星訥宣力有年衰老可念命以原官加一級致仕十四年自陳戰功請復世職部議星訥前任工部獲罪應削恩詔所加之爵仍留戰功所得世職奉旨復一等輕車都尉兼一雲騎尉予世襲康熙十三年卒賜祭葬孫巴爾達襲

蘇克薩哈

蘇克薩哈滿洲正白旗人姓納喇氏額駙蘇納長子也初委署佐領崇德六年隨鄭親王濟爾哈朗等圍錦州明人出步騎接戰敗之太宗文皇帝聞明總督洪承疇以師十三萬赴援親帥大軍環松山列營敵兵遁走蘇克薩哈同護軍統領漢岱追敗其衆於塔山翼日復追擊明兵於海岸隨豫親王多鐸等設伏襲擊與漢岱追斬杏山兵之潛遁者二年敘功授騎都尉世職尋晉三等輕車都尉七年世祖章皇帝念蘇克薩哈父蘇納在太祖太宗時屢著功績繼因隱匿丁壯削世職



三等輕車都尉至是特旨復蘇納世職以蘇克薩哈併襲爲三等男八年任議政大臣九年兩遇覃恩晉爵一等男加一雲騎尉初蘇克薩哈隸睿親王多爾袞屬下既睿親王薨於獵所蘇克薩哈與王府護衛詹岱等舉首其殯殮服色違制及謀遷永平諸逆狀命諸王大臣質訊皆實遂論睿親王如謀逆律是歲擢鑲白旗護軍統領十年流賊張獻忠餘黨孫可望聚寇湖廣蘇克薩哈奉敕同都統陳泰等率禁旅出鎮湖南與經略洪承疇會師進剿十二年賊帥劉文秀遣僞將盧明臣馮雙禮等分兵犯岳州武昌蘇克薩哈伏兵邀擊大敗賊衆明臣等復遣賊縱艦拒戰又擊敗之文秀引兵寇常德戰艦千餘蔽江而下蘇克薩哈指揮軍士奮勇截擊明臣等悉衆抗禦我軍協力撲剿六戰皆捷縱火焚其船斬獲無算明臣赴水死雙禮被創遁降其僞副將等四十餘人文秀走貴州明年敍功晉爵二等子任領侍衛內大臣加太子太保十八年正月與索尼及遏必隆鼈拜等受顧命爲輔政大臣奉聖祖仁皇帝嗣統是時索尼爲四朝舊臣遏必隆鼈拜皆以公爵先蘇克薩哈爲內大臣鼈拜尤功多意氣凌轢人多憚之蘇克薩哈以額駙子入侍禁廷承恩眷奉遺詔輔政名亞索尼與鼈拜稱姻婭而論事多與鼈拜迕積以

成讐索尼亦惡蘇克薩哈會鼇拜欲令鑲黃旗與正白旗互易屯莊索尼贊成之  
遏必隆弗能止遂行圈換之令旗民皆弗便康熙五年大學士兼管戶部尙書蘇  
納海坐撥地遲誤總督朱昌祚等坐紛更阻撓罪皆論死上覽部議召詢輔臣咸  
曰宜如議獨蘇克薩哈不對上因不允所請鼇拜卒矯詔並予棄市未幾索尼死  
鼇拜益驕恣蘇克薩哈慮其逼己也居常怏怏六年前上親政諭部議加恩輔臣以  
示酬庸之典越日蘇克薩哈奏言臣才庸識淺蒙先皇帝眷遇拔授內大臣早夜  
悚懼恐負大恩當先皇帝上賓之時惟願身殉以盡愚悃不意恭承遺詔臣名列  
於輔臣之中分不獲死以蒙昧餘生勉竭心力冀圖報稱不幸一二年來身嬰重  
疾不能始終效力於皇上之前此臣不可道之罪也茲遇皇上躬親大政伏祈睿  
鑒令臣往守先帝陵寢如綫餘息得以生全則臣仰報皇上參育之微忱亦可以  
稍盡矣疏上有旨諭議政王貝勒大臣曰蘇克薩哈奏請守陵如綫餘息得以生  
全不識有何逼迫之處在此何以不得生守陵何以得生其會議具奏王貝勒等  
以大臣怨望奏請逮治鼇拜與其黨大學士班布爾善等謂蘇克薩哈不欲歸政  
文致之構罪二十四款坐奸詐欺飾存蓄異心論如大逆應與其長子內大臣查

克旦皆磔死餘子侍衛穗黑塞黑里郎中那賽塞克精額達器德器孫倭克札兄弟之子圖爾泰海蘭皆斬決籍沒族人前鋒統領白爾赫圖侍衛額爾德烏爾巴亦皆斬決獄具入奏上知鼈拜素與蘇克薩哈有隙是以構成罪款必欲置之重典諭以核議未當不許所請鼈拜攘臂上前強奏累日卒坐蘇克薩哈處絞餘悉如議八年五月鼈拜既敗特諭吏兵二部曰蘇克薩哈雖有罪不致誅滅子孫此皆鼈拜挾仇滅其後嗣深爲可憫白爾赫圖等無罪誅戮殊爲冤枉其蘇克薩哈及白爾赫圖等官俱應給還七月復蘇克薩哈原官及世爵三等子命其幼子蘇常壽承襲

### 蘇納海

蘇納海滿洲正白旗人姓他塔喇氏岱圖庫哈里之曾孫也初爲睿親王多爾袞護衛世祖章皇帝順治三年正月授弘文院學士命隨肅親王豪格討流賊張獻忠十一月獻忠滅王令蘇納海先還奏捷六年隨英親王阿濟格討大同叛鎮姜瓖僞總兵楊振威等斬瓖首以獻王亦令蘇納海馳奏上卽命往軍中宣恩諭仍隨英親王還京七年以繙譯三國志告成賚鞍馬銀幣兩遇恩詔授世職騎都尉

兼一雲騎尉尋以甄別各官濫邀世職削雲騎尉九年正月詔重修太宗文皇帝實錄充副總裁官十一月盛京總管葉克舒奏獲朝鮮國越界採獲人命蘇納海同副都統瑚沙攜其人往朝鮮敕國王李滉會翰明年三月還京以滉陪臣至賈表謝罪附貢方物是年擢吏部侍郎十一年同尙書巴哈納侍郎額爾德等分賑畿輔十二年兼任鑲紅旗滿洲副都統十三年戶部援恩詔赦免員外郎朱世德虧缺河西務額稅世德官如故吏部亦弗置議得旨詰問乃以世德應褫職逮訊覆奏部臣坐瞻徇降革有差蘇納海罷任革世職逾月上以蘇納海舊在內院練習院務起授國史院學士尋充經筵講官遷禮部侍郎十六年加太子少保十七年擢工部尙書旋調兵部是時海賊鄭成功踞臺灣四出劫掠有言瀕海居民宜移之內地者蘇納海同侍郎宜理布奉命赴江南浙江福建會勘定議聖祖仁皇帝卽位擢國史院大學士康熙二年兼管戶部尙書事五年輔政大臣鼐拜蘇克薩哈有隙鼐拜因已隸鑲黃旗蘇克薩哈隸正白旗欲以正白旗屯莊改撥鑲黃旗而別圈民地給正白旗使旗人訴請以牒戶部蘇納海持不可謂旗人安業已久民地曾奉諭不許再圈宜罷議鼐拜銜之矯旨遣貝子溫齊等履勘旋以鑲黃

旗地不堪耕種疏聞遂遣蘇納海會同直隸總督朱昌祚巡撫王登聯經理其事昌祚登聯交章言兩旗人較量肥瘠相持不決而旗地待換民地待圈所在荒廢不耕農人環訴失業請停止圈換之令蘇納海亦以屯地難於丈量候明詔進止鰲拜遂擅坐蘇納海藐視上命遲誤撥地械付刑部議罪部議律無正條應鞭百籍沒家產上覽疏知鰲拜以蘇納海始終不阿欲置之死地召四輔臣詢問鰲拜極言情罪重大索尼遏必隆附和之獨蘇克薩哈不對上仍以部議不按律文弗允鰲拜出矯旨卽予處絞八年上親政以鰲拜罪惡衆著命逮治於是議政王大臣等列狀入奏因及誣陷蘇納海事鰲拜既伏罪上諭部臣曰朕閱處分蘇納海原案由鰲拜等以撥地遲延遽行逮問多端文致誣陷不按律文任意處死冤枉可憫宜予恩卹於是賜祭葬如例諡曰襄愍以其子瓦爾達爲三等侍衛

### 朱昌祚

朱昌祚漢軍鑲白旗人世祖章皇帝時任宗人府啟心郎順治十八年四月授浙江巡撫既抵任會浙東西皆旱災昌祚捐金爲倡煮粥以活饑民復具疏請旨賑卹時海寇未靖有旨令瀕海居民遷移內地昌祚疏請酌撥荒田給令開墾爲生



俟三年成熟後照例起科其舊居所棄之田畝丁糧請予蠲免俱下部議行先是陝西巡撫扈申忠條奏軍民宜一體聽徭敕下督撫議昌祚奏浙省各衛所均有運糧之責其閒丁每年亦各賦丁銀以爲貼造糧艘之費與秦省衛所無糧運者不同難以復兼民役事遂寢聖祖仁皇帝康熙三年六月擢福建總督以丁憂未之任四年特起直隸山東河南三省總督請終制不允五年抵總督任疏言直隸總督經制額兵舊駐河間提標額兵舊駐大名今總督駐劄大名提督改駐河間若令兩標兵彼此調移恐攜帶家口致累民間請免調兵丁但更換統轄之員爲便得旨俞允時輔政大臣鼈拜以鑲黃旗地畝瘠薄傳旨圈換正白旗地畝及開墾成熟民地令朱昌祚同戶部尙書蘇納海巡撫王登聯經理其事昌祚疏言直隸省州縣田地之瘠薄膏腴賦稅之上中下則原自異同豈能盡美今令兩旗更正地土原欲其彼此均安但臣見現在行圈地畝皆曉曉有詞大概以瘠易腴者固緘默不言而以腴易瘠與以瘠易瘠者不免觀望嗟吁皆不樂有此舉雖勉強撥給難必其異日不出而申訴重煩睿慮臣思安土重遷人之至願兩旗分得舊處莊地二十年來相安已久靡不有父母墳墓在焉一日更易不能互相移徙且值

此隆冬各旗率領所屬沿村棲守守候日久窮苦者囊糧已盡凍餒可憫又附近百姓聞朝廷此舉所在驚惶且據土民環門哀籲有謂州縣熟地皆已圈去無餘今之夾空地土皆係所遺窪中經墾闢成熟當差辦稅者有謂地在關廂大路鎮店所居民皆承應運送皇陵物料並墊道修橋及一切公差徭役者有謂被圈地之家卽令他往無從投奔者有謂時值冬令扶老攜幼遠徙他鄉恐地方疑爲逃人不容棲止者有謂祖宗骸骨父母邱壠不忍拋棄者臣職任安民而民隱如此何敢壅蔽不以實聞臣又徧察薊州及遵化等應換州縣一聞圈丈自本年秋收之後周遭四五百里盡拋棄不耕今冬二麥全未播種明年夏盡安得有秋且時已仲冬計丈量竣事難以定期明春東作必又失時而秋收亦將無望京東各州縣合計旗與民失業者不下數十萬人田荒糧竭無以資生豈無鋌而走險者地方滋事尤臣責任所關不敢畏忌越分不以實聞伏乞斷自宸衷毅然停止疏入與蘇納海王登聯請停圈各疏並忤鼈拜意革職逮問刑部議律無正條擬鞭責籍沒家產鼈拜入奏應置重典上未允鼈拜出矯旨並予立絞八年鼈拜獲罪逮繫上特諭吏部曰原任總督朱昌祚巡撫王登聯於撥換地畝時見旗民交困有



地方之責具疏奏聞鼇拜輒謂非其職掌妄行干預不按律文誣陷至死深爲可憫其予昭雪以示仁恩昌祚復原官賜祭葬如典禮諡勤愍祀直隸浙江名宦祠子紱以廕入監讀書授督捕理事官尋遷大理寺卿

王登聯

王登聯漢軍鑲紅旗人世祖章皇帝順治六年由貢生授河南鄭州知州八年巡撫吳景道奉詔考核府州縣官疏薦登聯有德有才遂擢山東濟南道十三年內陞通政司參議十五年遷順天府丞十七年二月遷大理寺卿九月授保定巡撫十二月疏言近日盜案多而緝獲者少不嚴立法恐有諱盜不報之弊其降革戴罪督緝者又恐有真盜未獲朦朧開復之事嗣後失事不報之州縣當立行拏問治以縱盜之罪道府捕廳治以徇庇之罪使知申報者雖降革可望開復匿報者不能脫罪且累及上官則無敢諱隱矣其獲盜也或係自拏或係協拏務必眞盜淨盡方可銷結如以他案從犯充數借殺死搪塞者日後眞盜犯事前局敗露雖經遷陞仍行追究使知開復之不可徼倖則必拏眞盜自贖矣欲弭盜必嚴究窩主窩主慮及敗露每不令在本地行劫故所在官司明知其爲巢穴而不問嗣後

問擬強盜務究窩家其州縣衛所與諱盜者一體處分若隣里出首番捕訪獲以所起贓私一半給賞如窩主能悛改前惡擒大盜出首者免罪文武職官實力訪緝者分別紀錄庶萑苻靖而境域寧也疏上得旨所奏於弭盜有裨下部詳議俱議行十八年六月聖祖仁皇帝御極裁順天巡撫以登聯兼理其事加工部尙書銜康熙四年河間大名所屬州縣歉收登聯先後奏請發粟賑濟並從之五年十月輔政大臣鼇拜以鑲黃旗地畝瘠薄傳旨圈換正白旗地畝及開墾成熟民地令戶部尙書蘇納海會同總督朱昌祚與登聯經理其事登聯分勘京東諸路因疏言圈換田地正值大小二麥墾種之時臣同部臣東往豐潤灤州諸處荒涼極目民地之待圈者寸壤未耕旗地之待圈者半犁未下恐明歲春夏青黃不接無從得食此旗人與百姓並困之情形也臣同各旗副都統至玉田縣相度甫施一圈而旗下官丁咸謂此非山岡石磧卽沙淤鹽鹵不肯承受又有舊圈內房屋多而今圈內房屋少者有此地內房屋可居而彼地內房屋破壞者一經移換則舍舊謀新薪糧必多耗費器具亦有損傷此旗下官丁相持不決之情形也至百姓情形更有難於見聞者自圈地之令一傳知舊業難守有米糧者已糶賣矣無積

蓄者將轉徙矣婦子老幼環泣馬前云普天之下莫非王土圈丈固所宜然但撥補不知何處目前霜雪載途懼填溝壑將往奔他境而逃人令嚴誰容棲止仍僦集本土而人稠地窄難以賃居又有謂丁地相依地去而丁不除賦免而徭尙在餬口無資必虧課額者臣往來玉田豐潤遞呈士民不下千百又謂自順治三四年兩次大圈地土雖撥城關集鎮奉旨悉留今若概行圈換百姓必致散亡若皇差陵工運石載料誰爲填築搭橋修路挽拽之夫朝貢使臣誰任奔走供應之事所關似亦非小夫循制易地非臣所敢臆測但目擊情形不敢壅於上聞乞敕部臣從長酌議俾兩旗各安舊業畿東億萬姓俱免播遷幸甚疏入與蘇納海朱昌祚請停圈各疏並忤鼈拜意下部議革職逮問鼈拜矯旨並予立絞八年鼈拜獲罪逮繫詔雪其誣互詳蘇納海朱昌祚傳王登聯復原官賜祭葬如典禮諡愨愨祀直隸名宦祠子盛唐以廕入監讀書授督捕理事官

鼈拜

鼈拜滿洲鑲黃旗人姓瓜爾佳氏偉齊第三子也初爲護軍校從征屢立戰功天聰八年授騎都尉世職任參領從太宗文皇帝征察哈爾收其散亡部衆旋奉命

與護軍統領譚泰等由上方堡入明邊設伏以違界出略又不至期會地詔奪其所俘獲崇德二年隨征明皮島武英郡王阿濟格集諸將問進取之策鼇拜與參領準塔願爲前驅與王約曰不得此島勿復見王遂與準塔連舟渡海敵嚴陣拒堡上我兵莫能登鼇拜大呼超躍而上冒矢石直前搏戰準塔繼之明軍披靡遂克其島太宗以此島可比大城命優敘晉三等男賜巴圖魯號四年率護軍略地錦州有斬獲六年隨鄭親王濟爾哈朗圍錦州以步戰敗明步軍營功最得優賚晉爵一等男方大兵之圍錦州也明援兵踵至城內兵復乘間衝突夾擊我軍鼇拜往來接戰每不待軍令輒當先陷陣五戰皆捷時明總督洪承疇等率兵十三萬赴援太宗親統大軍環松山而營敵兵出犯屢擊卻之還營度明師必宵遁命鼇拜移駐右翼汛地協力追剿夜一鼓明兵果遁鼇拜與護軍統領阿濟格尼堪等相繼躡擊擒斬過半七年擢護軍統領八年隨貝勒阿巴泰等征明攻邊城指揮本旗兵先登克之長驅入邊敗明守將進薄燕京略地至山東三敗明兵斬殺甚衆攻兗州府及臨清汶上諸邑並麾軍前進有功別遣將士略取四城凱還師次密雲擊走敵兵三千復破明總兵吳三桂總督范志完諸軍是歲十月敘功晉

三等子賚金帛甚厚順治元年隨大兵定燕京二年世祖章皇帝命考核羣臣功績鼇拜以忠勤戮力晉一等子隨英親王阿濟格征湖廣至安陸破流賊李自成兵睿親王多爾袞以英親王有罪令鼇拜與都統譚泰於軍中集衆暴其狀鼇拜譚泰匿之不以示衆論罪罰鍰明年隨肅親王豪格征四川敗叛將賀珍兵於楚湖師抵西充賊渠張獻忠列營拒戰鼇拜奮擊大破之斬獻忠於陣賊衆收合餘燼復犯我師鼇拜遣軍士連擊敗之旋偕侍衛李國翰等分剿賊黨俘斬無算下遵義夔州茂州諸郡邑五年二月部臣論隨征參領希爾根冒功爭賞罪鼇拜坐軍中詳勘不實論革世職又以貝子屯齊等訐告鼇拜於崇德八年與護軍統領圖賴等六人謀立肅親王私結盟誓廷議應死並得旨罰贖四月侍衛科普索訐告鼇拜擅撥護軍爲侍衛遏必隆守門仍論死上復宥之十一月統兵駐防大同時總兵姜瓖叛鼇拜率七騎敗賊兵三百餘明年端重親王博洛率師至與鼇拜合攻大同鼇拜遣部將敗賊兵之奪我礮者賊將楊振威率兵萬餘犯正藍旗營鼇拜以右翼三旗兵大破其衆賊兵五千餘由大同北山至立兩營逼我軍鼇拜率精兵進剿破其一營乘勝逐北瓖聞北山援兵至亦盡發城中兵出拒我師鼇



拜縱擊斬獲殆盡賊將復以兵截戰敗之於忻口再敗之於晉祠鎮攻汾州關克孝義縣皆以捷聞七年睿親王有疾貝子錫翰等請駕臨幸王以錫翰違令瀆請鼇拜目擊其非不卽執訊降爵爲一等男并罰贖復隨世祖親征晉三等侯八年任議政大臣敍功晉一等侯兼一雲騎尉九年自陳勞績且以忤睿親王意致屈抑戰功訟於上前詔部議晉二等公賜敕予世襲免死二次尋授領侍衛內大臣十三年奏請三年一次舉行大閱以講武事傳令大臣侍衛等御前較射著爲令是年十一月創發臥疾上親臨視明年以恩詔加少保兼太子太保尋加少傅兼太子太傅教習武進士十八年受顧命奉聖祖仁皇帝嗣統與內大臣索尼蘇克薩哈遏必隆爲輔政大臣旣受事與內大臣飛揚古有隙又飛揚古子侍衛倭赫及侍衛西住折克圖覺羅塞爾弼同直御前不加禮輔臣鼇拜惡之遂論倭赫等擅乘御馬及取御用弓矢射鹿罪並棄市坐飛揚古怨望亦棄市并殺其子尼侃薩哈連籍其家以與弟都統穆里瑪先是鑲黃旗屯莊畫給保定河間涿州之地已二十年蘇克薩哈鼇拜姻婭也論事多齟齬積而成讐鼇拜因蘇克薩哈籍隸正白旗欲以薊州遵化遷安諸莊改撥鑲黃旗而別圈民地給正白旗康熙五年

使旗人訴請以牒部大學士蘇納海管戶部議阻之貝子溫齊等以履勘鑲黃旗地不堪耕種疏聞遣蘇納海與直隸總督朱昌祚巡撫王登聯丈量酌易時則兩旗人較量肥瘠相持久不決而旗地待換民地待圈所在荒廢不耕百姓環訴失業昌祚等交疏請停止圈換之令鼇拜怒坐蘇納海撥地遲誤昌祚等紛更妄奏悉逮治棄市且以蘇納海族人已故額駙英俄爾岱爲睿親王私黨令部臣盡削世職以洩其忿明年議蘇克薩哈罪慮大學士巴泰逆己意不使與聞坐蘇克薩哈以大臣缺望蓄異志論應磔死上鑒其枉鼇拜攘臂強爭卒予絞并誅其族屬鼇拜之受顧命也名列遏必隆後至是索尼死矣班行章奏鼇拜皆前列日與弟穆里瑪姪侍衛塞本特訥莫大學士公班布爾善尙書阿思哈噶褚哈馬爾賽都統濟世侍郎泰璧圖學士吳格塞等黨比營私是時侍讀熊賜履遵旨條奏時政有曰內臣者外臣之表也又曰急功喜事但知趨目前尺寸之利以便其私圖鼇拜聞而惡之曰是劾我也入對時輒請申禁言官不得上書陳奏聖祖旣躬親大政冀其感恩悔罪克保功名特命鼇拜於二等公外加賜一等公以其子那摩佛襲二等公爵七年世祖配天覃恩加鼇拜太師加那摩佛太子少師時有竊其馬



者鼈拜捕斬之併殺御馬羣牧長怒蒙古都統俄訥喇哈達宜理布於議政時不  
附已卽令蒙古都統不與會議馬爾賽故部臣請諡上不允鼈拜令仍給與諡八  
年五月上以鼈拜結黨專擅弗思悛改命議政王大臣等逮治鼈拜罪諭曰前工  
部尙書員缺鼈拜以朕素不知之濟世妄稱才能推補通同結黨以欺朕躬又奏  
稱戶部尙書應授二員將馬爾賽徇情補用又鼈拜於朕前辦事不求當理稍有  
拂意卽將部臣叱喝引見時在朕前施威震衆科道官條奏鼈拜屢請禁止恐身  
干物議閉塞言路凡用人行行政欺朕專權恣意妄爲文武各官欲盡出伊門下與  
穆里瑪等結成同黨凡事在家定議然後施行且倚仗兇惡棄毀國典與伊相合  
者薦拔之不合者陷害之朕念鼈拜舊臣望其改惡悔過今乃貪聚賄賂奸黨日  
甚上違君父重托下則殘害生民種種惡跡難以枚舉其嚴拏勘審於是康親王  
傑書等列其攬權欺罔諸罪狀請革職立斬籍沒那摩佛亦論死上親加鞫問情  
罪俱實諭曰鼈拜以勳舊大臣受恩皇考遺詔輔佐政務理宜精白乃心盡忠圖  
報不意結黨專權紊亂國政紛更成憲罔上行私朕久已悉知尙望其改行從善  
克保功名以全終始乃近觀其罪惡日多命諸王大臣公同究審俱已得實以所

犯重大擬以正法本當依擬處分但念鼈拜在累朝效力年久且皇考曾經倚任朕不忍加誅姑從寬革職籍沒仍行拘禁那摩佛亦免死革職拘禁鼈拜死乃出那摩佛於獄而釋之卒於家五十二年上復念鼈拜戰陣功多特追賜一等男以其弟巴哈之孫蘇赫襲蘇赫卒仍以鼈拜孫達福襲世宗憲皇帝時賜鼈拜祭葬復一等公世襲罔替加封號曰超武

巴哈

巴哈滿洲鑲黃旗人姓瓜爾佳氏偉齊第四子也初任一等侍衛太宗文皇帝崇德二年設議政大臣二十有四巴哈與焉證明錦州凱旋上幸牧馬所命內大臣侍衛與新降之明總兵祖大壽等校射獎賞有差巴哈得賜駝一世祖章皇帝順治元年隨大軍入山海關定燕京二年以巴哈在太宗朝扈從著勞授騎都尉世職時睿親王多爾袞攝政都統譚泰訐內大臣索尼詆誹睿親王及捕魚牧馬鼓琴演戲諸款法司鞠訊以巴哈曾與索尼同觀偶戲議革世職罷任詔賞之三年隨肅親王豪格征陝西四川尋以考滿並敘隨征功晉世職至一等輕車都尉六年睿親王帥師討大同叛鎮姜瓖巴哈請從征自效王弗許復再三請王使人諭

以或隨明甲隊或隨暗甲隊惟所自便巴哈知王終弗用也拂衣起遽歸翼日議罪應斬改罰贖七年睿親王有疾貝子錫翰等奏請上駕臨視睿親王罪以擅請並責巴哈弗執問復罰鍰八年上親政命爲議政大臣三遇恩詔晉爵至一等男初肅親王爲睿親王構陷卒於獄子富綬尙幼尙書宗室鞏阿岱議殺之巴哈同內大臣哈什屯持不可乃止鞏阿岱與其弟錫翰及侍衛冷僧機勸睿親王疎遠巴哈及其兄鼈拜旣而錫翰復以巴哈入直御前因數集內大臣西訥布庫等議其罪復聞有旨嘉巴哈勤勞議乃寢至是上以鞏阿岱錫翰冷僧機西訥布庫等朋比妄行命諸王大臣翰訊巴哈證其狀咸伏誅十二年以巴哈恪供職業加少保兼太子太保十四年晉少傅兼太子太傅十五年授領侍衛內大臣聖祖仁皇帝康熙六年以其子訥爾都尙公主封和碩額駙八年上以察哈爾阿布奈久缺朝請無藩臣禮命巴哈往察其狀及還會鼈拜以結黨擅權獲罪同父兄弟並褫革論斬籍沒上念巴哈宣力年久貸其罪並免籍沒後以疾卒

### 瑪爾賽

瑪爾賽滿洲正白旗人姓他塔喇氏世祖章皇帝順治七年襲父譚拜二等男爵

尋兩遇恩詔晉一等男兼一雲騎尉十五年署副都統隨寧南大將軍宗室羅託自湖南征貴州既定貴陽同護軍統領科爾崑率兵五千擊走僞鞏昌王白文選取黃平州十六年八月旋師次荊州聞海賊鄭成功陷鎮江犯江寧偕副都統噶褚哈率兵由大江趨援與駐防將軍喀喀穆總督郎廷佐等擊敗賊兵并力守城賊衆數萬屢薄城窺犯瑪爾賽率兩翼兵奮擊殲賊甚衆追剿至鎮江賊竄入海敘功晉爵一等子聖祖仁皇帝康熙元年授正白旗滿洲副都統二年隨將軍穆里瑪圖海征湖廣流賊李來亨高必正等於茅麓山戰輒捷連破賊寨來亨自縊死必正率衆降六年擢工部尙書尋調戶部七年兼正白旗蒙古都統時淮徐河堤屢決總河楊茂勳請於天妃關外築壩逼黃引淮出口俾黃淮相抵以歸海給事中李宗孔請塞盱眙決口以防淮流上命瑪爾賽同刑部尙書明珠往江南會勘定議尋疏言興化縣白駒場舊設四閘洩水由牛灣河入海近年閘俱填塞水無所洩宜卽疏濬仍置版以時啟閉清口爲黃淮交匯漕運要津黃水強則越淮淮水弱則沙土得入壅運道宜於黃河北岸多濬引河以分其勢使沙逐水流運道無阻又董口沙淤難行每歲修築徒費無益其右有駱馬湖可通宜添築堤岸

以爲緯道盱眙縣翟家壩之北古溝鎮諸決口卽宜堵塞使全淮盡由清口會黃入海詔如所議行初瑪爾賽與內大臣班布爾善皆諂事輔政大臣鼇拜鼇拜遂引班布爾善爲大學士而欲以瑪爾賽爲戶部尙書時已有旨擢任兵部侍郎瑪希納鼇拜疏援順治年間曾設滿洲尙書二員故事以薦瑪爾賽旣任戶部與尙書王宏祚論事齟齬不得自專適戶部有失察書役假印盜庫金事吏部議瑪爾賽王宏祚處分並援恩詔寬免班爾布善獨票擬宏祚革任爲瑪爾賽洩忿八年正月瑪爾賽病歿得旨予祭奠如例鼇拜擅予諡曰忠敏未幾鼇拜及班布爾善皆獲罪逮訊得瑪爾賽黨附狀論追革官爵戮屍籍沒詔免戮屍以所襲二等男爵予譚拜從孫佛保襲

### 索尼

索尼滿洲正黃旗人姓赫舍里氏父碩色大學士希福兄也太祖高皇帝時碩色自哈達部挈家來歸太祖以其兄弟父子並通國書及蒙古漢人文字咸擢置文館理事賜碩色希福巴克什號授索尼一等侍衛使出入扈從隨軍征討時哈達兵犯界藩城索尼身先士卒擊敗之復隨征棟揆蒙古援兵雲集立二寨互爲犄



角索尼與諸將合兵攻剿拔其一寨餘衆悉降天聰元年從太宗文皇帝攻錦州  
遇明兵千餘徙大凌河戶口索尼以二十騎襲擊之多斬獲旋偵敵寧遠城內兵  
突出索尼奮勇力戰追擊敵兵至壕而返二年上親征喀爾喀徵兵外藩科爾沁  
不至既遣希福率健士八人往趣之復詔索尼與侍衛阿珠祐賚諭飭責土謝圖  
額駙奧巴初奧巴爲台吉入朝太祖以貝勒舒爾哈齊孫女妻焉既而奧巴屢違  
令約私與明通時復徵兵不至索尼於是稟受方略以行既入科爾沁其部人饋  
以牲索尼麾之去曰爾汗有異心爾物安可食耶部人以告奧巴奧巴病足居別  
室索尼與阿珠祐詣見公主以諭旨告奧巴奧巴聞之扶掖至佯問曰此爲誰索  
尼曰吾儕天使也爾有罪義當絕今特以公主故使來餽問耳奧巴語左右具饌  
索尼阿珠祐不顧而出奧巴恐使台吉塞冷等請其事索尼出璽書示之卽令從  
者先行奧巴得書大驚令所屬大臣環跪請曰汗獲重罪甚惶懼今寇騎塞路恐  
使者卽歸遭侵掠益滋汗咎請少留索尼曰銜君命而來死何足辭與阿珠祐拂  
衣起整轡欲行衆皆泣且曰汗欲引罪自謝扣馬首力挽之乃止翼日奧巴辭以  
足疾欲令其台吉拜思噶爾及桑噶爾寨偕索尼等入謝索尼曰汝欲解己罪而

使二人行吾豈爲取拜思噶爾等而來耶奧巴乃使人請曰上恕我我固應肉袒謝懼不我容而逐我耳索尼曰皇上覆載如天地汝果引慝入朝雖有罪必蒙矜恤奧巴叩首決計入朝索尼見其悔罪輸誠與阿珠祐偕其大臣黨阿賴先歸奏狀俱稱旨三年從征明至燕京明寧遠巡撫袁崇煥等赴援列營於城東南索尼奉諭傳令左翼迎擊貝勒豪格先馳入陣敵兵蹙之矢石如雨索尼躍馬突入東西衝擊斬殺甚衆遂拔貝勒於重圍明年正月大軍至榛子鎮城內無官守索尼同文臣達海頒漢字詔諭降其民復招撫沙河驛越日拔永平與達海等奉命執黃旗於城上以漢語遍諭軍民皆歸順二月班師隨貝勒阿巴泰等率將士守永平五年正月朝鮮使臣樸蘭英來朝賜其王薺蘭英以賞薄辭索尼與參領英俄爾岱等斥責之蘭英懼拜命七月擢吏部啟心郎從征明圍大凌河城明兵自錦州赴援索尼持短兵步戰敗之九月奉命往瀋陽宣布捷音踰月偕參將祝世昌率漢軍千六百人及朝鮮使臣至軍營十二月與達海等奏定元旦朝賀儀制明年從征察哈爾由大同入明邊取阜臺寨會六部官署工竣上召索尼及諸啟心郎諭以啟迪諸貝勒俾勤事改過毋曠厥官八年以索尼任職吏部事無闕失授



騎都尉世職仍與學士羅什等日直內院凡宣示諭旨及察審功罪咸當上意值有旨以郡王禮祭貝勒岳託吏部尙書阿拜誤以岳託子襲封郡王傳語都統葉臣事聞下廷臣議誤傳詔旨罪以索尼任吏部郎官應連坐論罰鍰上曰索尼未經奉旨豈肯妄言特命免議崇德八年考績超授三等男世祖章皇帝順治元年都統何洛會等訐告肅親王豪格言詞悖妄王坐廢爲庶人詔王大臣集衆宣示以索尼忠貞戮力不附肅王與都統譚泰護軍統領圖賴並賜鞍馬二年晉二等子是時睿親王多爾袞攝政以索尼旣列子爵不宜復列郎官令解啟心郎任仍理部事先是索尼叔父希福以不附睿親王爲譚泰構罪劾罷未幾索尼發譚泰隱匿諭旨事譚泰亦坐削公爵有求古琴於索尼者索尼於庫內取漆琴與之索尼又嘗令僕從於禁門橋下捕魚見庫院草長使牧者秣馬院中譚泰遂臚狀劾索尼下法司勘訊論死睿親王奏從輕典削世爵永不敘用遂罷廢三年正月圖賴劾譚泰事涉索尼逮問圖賴曰譚泰有罪吾於途次作書致索尼使啟睿親王索尼以不啟聞及訊實書者塞爾特曰書達索尼索尼囑我勿言也諸大臣論索尼罪當斬王親翰之索尼曰吾發譚泰擅隱諭旨罪願匿圖賴書以庇之乎復訊

塞爾特因得佐領希思漢慮譚泰得罪投書於河狀索尼遂昭雪尋復授二等子  
索尼終不附睿親王於政事多以理爭王由是惡之五年以貝子屯齊等訐告索  
尼於崇德八年秋與圖賴等謀立肅親王私結盟誓議罪應死有旨免死褫職輸  
贖鍰遣守昭陵追奪賞賜八年上既躬親大政以前議索尼罪不實特召還朝復  
其爵遇恩詔晉三等伯予世襲九年復命諸王議功晉一等伯賜敕免死二次擢  
內大臣兼議政大臣總管內務府事十七年應詔上言十一事一曰小民冤抑有  
司不爲詳審者宜別爲嚴察使無壅於上聞二曰凡犯罪發覺問官以奉有嚴旨  
往往不察其情輒加重罪不無枉濫乞敕法司量情詳愼三曰前議福建將士罪  
在大將軍者止削一不世襲之騎都尉而所屬將領其子爵男爵乃盡議革輕重  
不均有乖懲勸請敕更正四曰凡開國之臣自騎都尉以上皆有功行間及贊成  
大業者所授之職宜予世襲其後非有戰功恩詔所加不宜給世襲敕書五曰在  
外諸藩風俗不齊若必嚴以內定之例恐反滋擾宜格外寬容六曰近聞大臣勢  
豪奪據行市奸宄之徒投託指引以攘貨財請旨嚴禁七曰今四方商賈擔負捆  
載來京者多爲旗下大臣家人短價強買人將畏而不前請察禁八曰諸王貝勒

以及各官私引玉泉山之水爲灌溉致竭泉流當禁九曰邊外木植皆商人僱民採伐水運解部故額稅之外令自售賣使利及商人今聞大臣於採木之地私行強佔以致商不聊生請禁止十曰大臣不殫力公事惟飾宅第請懲禁十一曰五城審事諸官遇世族富家與窮民構訟必罪窮民曲意徇私不思執法請嚴飭無得枉情納賄恣意妄行疏入上以所奏皆實事宜申禁飭部議行十八年正月世祖升遐遺詔以索尼與大臣蘇克薩哈遏必隆鼐拜四人輔政於是索尼及諸臣盟誓受事尋蘇克薩哈與鼐拜爭事成隙索尼惡之年已老矣且有疾康熙六年正月與輔臣等奏請聖祖仁皇帝親政四月上諭吏部曰輔政大臣伯索尼太祖高皇帝時眦勉效力太宗文皇帝任以內外大事悉能果斷殫厥忠誠世祖章皇帝時亦任以內外大事竭忠純篤以其勳舊忠貞堪受重託遺詔俾令輔政恪遵顧命夙夜靖共厥績茂焉今旣染疴且復年邁宜特加恩寵以示酬庸之典下王大臣會議晉一等公與前所授一等伯並世襲索尼以寵榮逾分悚仄難安陳情辭一等公爵得旨嘉獎仍令祇遵成命不必遜辭是年七月卒賜祭葬有加禮謚文忠以第五子心裕襲一等伯第六子法保襲一等公長子噶布喇任至領侍衛

內大臣十三年十二月聖祖因孝誠仁皇后推恩所生授爲一等公第三子索額圖別有傳

遏必隆

遏必隆滿洲鑲黃旗人姓鈕祜祿氏額亦都第十六子也母和碩公主天聰八年太宗文皇帝賜敕命遏必隆襲其父一等子爵任侍衛九年詔免功臣徭役遏必隆與焉並給人戶使管佐領事貝勒尼堪福晉遏必隆兄都統圖爾格之女也無子謀取僕婦女作爲己生尼堪入奏命刑部承政索海等會鞫之遏必隆告於鄭親王濟爾哈朗曰索海與尼堪爲姻戚恐左袒宜勿與訊及會勘福晉謀作事實遏必隆坐徇庇欺誑削爵崇德六年從上征明移營松山濬濠環守明總兵曹變蛟率乳峯山步騎欲棄寨突圍出屢犯兩黃旗營遏必隆連擊敗之夜三鼓變蛟集敗兵突犯御營遏必隆與侍衛坤巴圖魯巴什塔及大臣錫翰等堅守後營門壘力戰殫十餘人變蛟負創以其衆遁走詔守衛不嚴諸臣輸罰鍰分賚禦敵將士遏必隆得優賞七年隨饒餘貝勒阿巴泰等征明入長城克薊州進兵山東抵兗州攻夏津先登克其城授騎都尉世職順治二年流賊李自成遺孽李錦與賊

黨郝搖旗等竄聚湖廣爲亂荆襄武漢道路多梗遏必隆隨順承郡王勒克德渾往討之師次武昌賊據守要隘遏必隆先衆攻擊大軍繼進斬殺無算遂拔鐵門關敘功晉二等輕車都尉五年兄子侍衛科普索訐其與白旗諸王有隙設兵護門事論死籍沒得旨免死革世職及佐領籍家產之半八年世祖章皇帝旣親政遏必隆訟削職寃詔復職明年科普索獲罪以所襲圖爾格之二等公爵令遏必隆併襲爲一等公有護軍擺思哈喇者當太宗上賓時託疾不守門至是已授騎都尉又一雲騎尉遏必隆舉劾其前罪下部鞠實置之法籍其家以與遏必隆旋任議政大臣三月掌鑾儀衛事十月擢領侍衛內大臣十四年加少保兼太子太保尋加少傅兼太子太傅十八年受遺詔與索尼蘇克薩哈鼐拜同爲輔政大臣康熙六年三月御史張惟赤疏請聖祖仁皇帝親政於是索尼等以歸政請遏必隆亦懇請再三是歲七月上躬親大政諭部加恩輔臣以示酬庸之典詔從部議加賜遏必隆一等公爵復以其長子法喀襲原授之一等公遏必隆奏辭不允賜戴雙眼孔雀翎明年加太師尋乞罷輔政溫諭慰留又明年再請乃許先是輔政時索尼老病鼐拜多專政與蘇克薩哈不相能遏必隆不能自異及鼐拜倡圈易



旗地之令中外大臣皆謂爲不便遏必隆欲停止窺鼈拜意在必行遂弗與爭既而鼈拜矯旨誅大學士蘇納海等復族誅蘇克薩哈遏必隆皆不爲阻亦不入奏八年鼈拜獲罪上以遏必隆同列輔政明知其惡而緘口不語詔法司併逮問論死上復念其結黨無實宥之削太師銜及後賜之一等公九年諭兵部曰前以輔政大臣遏必隆知鼈拜樹黨亂政不豫行糾劾故坐之罪今念其爲皇考顧命大臣且勲臣子其咎止於因循瞻顧未嘗躬負重愆特爲寬宥仍以公爵宿衛內廷遏必隆遂以一等公品級入朝侍直十二年十二月疾篤上臨視慰問及卒賜祭葬諡恪僖勒石墓道碑文稱其賦性敬慎制行端方愨誠報國著有勤勞云尋以冊立孝昭仁皇后推恩所生特旨令立家廟賜御製碑文復御書策名金石四字以額其祠五十一年上念遏必隆曾襲其父世爵緣事削除未襲特命以其第四子殷德襲一等子世爵

楊雍建

楊雍建浙江海寧人順治十二年進士除廣東高要縣知縣十五年兩廣總督王國光疏薦賢能謂其恤困窮若痾身釐奸弊如浼己於是行取入京考選授兵科

給事中時平南王尙可喜靖南王耿繼茂並鎮廣東十六年正月雍正疏言臣前官粵東目擊粵民困苦由兩藩並鎮每印官缺員市井無賴輒重賄鑽營委署取償民間凡往來饋運土木工作役民無限制增立鹽埠分設私稅縱悍兵開山伐木奪商賈利復於正賦外以藩令採買名曰王穀王席皆責民供應民困已極請移一藩於他省俾粵民甦息疏下部議以藩王應約束弁兵勿干預印官委署累商害民請旨飭禁尋詔移耿繼茂鎮四川旋改鎮福建先是上欲幸南苑雍正具疏諫止上既宣諭以閱兵習武之義復命雍正同科道官隨往翼日雍正疏昨奉上諭閱武南苑令諸臣侍從臣因得覩軍容之盛武備之備知皇上安不忘危原非無事而出始深悔前疏之愚昧無知皆由沽名釣譽習氣未除仰請敕部處分疏入得旨寬免四月疏劾銓政舛錯下宗人府都察院會議吏部諸臣削級罰俸有差五月海賊鄭成功陷鎮江犯江寧雍正劾兵部尙書梁清標等不經畫於幾先又不圖維於事後請嚴旨申飭俾痛改積習疏下吏部察議兵部諸臣削級罰俸有差雍正建累轉禮科吏科至刑科給事掌印給事中疏言明季仕途分門立戶意見橫生國事遂不可問由社盟標榜排擠報復所致請嚴飭學臣禁止士子立

社結盟以杜朋黨之漸又奏定鄉會兩試絕營競防弊竇之例疏俱下部議行康熙三年十二月因彗星見上疏請修省廣求直言詳詢利病有可惠民者立賜舉行疏入得旨楊雍建直言可嘉星象示異皆敷政失宜所致今惟力圖修省務期允當以答天心尋詔外內臣工各抒所見勿因循瞻顧雍建又言治化之未淳由於臣職之未盡比者部臣於應議之事或請移他部或請下督撫不肯直辭決斷一案之處分經年未結一事之行止重複咨詢民間利病所關憚於釐正輒援往例請議是惟以推諉爲卸責而無任事之實心也督撫知百姓之苦於私派浮征而不爲建長策以除積困見有司之貪暴培克間有特糾者反爲摘小罪以引輕條是惟以蒙蔽爲養奸而無澄清之實政也請嚴飭內外臣工力圖稱職如仍蹈舊轍立予罷斥上是其言四年戶部議令江浙二省停運白糧折銀解部以充兵餉雍建言比年江浙之米每石值七八錢而止今每石改折二兩加以耗羨備辦夫船之費非本色三石不足以完折色之一石臣以爲有本色則有耗羨有夫船既經改折不應并耗羨夫船而又徵之必不得已而議折則當權衡穀價之高下以便於民然亦可以權宜不可以久遠乞敕巡撫量時價減徵并敕戶部自今勿

輕議改折疏并下所司知之是年得旨內陞十一年命以四品頂帶食俸仍任給事中尋遷兵部督捕理事官右通政太僕寺卿十八年正月擢左副都御史疏劾江西巡撫佟國禎庸碌無能下部察議國禎降二級調用二月充會試副考官旋命巡撫貴州時逆賊吳世璠尙據雲南雍正建旣至貴陽請設撫標三營兵部以例止二營議駁奉旨貴州新經恢復地方緊要應如所請設立三營後不爲例又疏言貴陽殘破尙餘未燬室廬宜招復流散人民量減差役使安其業禁止借端私派上命雍正速行招集流民還業務令得所除供應大兵諸正役外有以私派擾民者卽指名劾奏二十年三月以軍興旁午奏停貴州本年鄉試俟來年補行十月疏言貴陽等七府土司錢糧若歸併附近知縣恐呼應不靈宜仍令土司管理責令知府督催下部議如所請二十一年十二月以考試武舉策問語涉譏諷部議革職得旨楊雍正爲封疆大臣如管兵官員不職應卽具疏糾劾考試關係大典乃於策題內暗含譏諷殊屬不合本當如議革職姑寬削去所有加級紀錄仍降五級留任二十三年八月授兵部左侍郎二十五年十一月以母老病歸養旣終制以部議保舉失當應降二級未赴補三十八年上巡幸浙江賜御書松喬堂

匾額三十九年詔舊任巡撫學政諸臣分修河工雍正建修高家堰隄工工竣議敘復所降級四十三年五月卒於家賜祭葬如例

米思翰子李榮保

米思翰滿洲鑲黃旗人姓富察氏哈什屯長子也康熙三年由侍衛襲父一等男兼一雲騎尉管佐領事六年任內務府總管時輔政大臣有欲假用尙方器具者米思翰俱嚴拒之不予聖祖仁皇帝既親政知其守正不阿授禮部侍郎八年擢戶部尙書旋列議政大臣先是各省歲賦聽布政使存留司庫每有挪移虧缺之弊米思翰疏請通飭各省自俸餉諸經費所餘悉解部由是勾稽出納瞭如指掌是時天下一統邊境戢寧而尙可喜鎮廣東耿精忠鎮福建藩屬將弁咸情遊驕縱吳三桂鎮雲南尤自恣要請無已俸餉多浮糜輸輓滋勞費十二年可喜請撤藩移遼東三桂精忠亦以是請疏下戶兵二部議米思翰與兵部尙書明珠等議令俱撤藩移山海關外時廷臣有言三桂不可撤者以兩議入奏米思翰堅持宜撤得旨允行既而三桂叛聖祖命王貝勒大臣率八旗兵征討議者以軍需浩繁謂宜就近調兵禦守米思翰言賊勢猖獗非綠旗兵所能制宜以八旗勁旅會



剿之至軍需內外協濟足支十年可無他慮於是請以內府所儲分年發給復綜核各省庫金倉粟以時撥運奏悉稱旨十三年六月偕戶部諸臣疏言大兵剿賊屢奉明詔以正賦給軍需恐有司尙多借端私派請敕各督撫嚴察所屬凡供應糧餉薪芻一切動用官帑毋許苛派其購自民間者務視時價支給勿纖毫累民奉諭如議速行是年十二月卒年四十有三聖祖軫恤備至予祭葬如典禮諡敏果方吳三桂耿精忠相繼叛滇黔楚蜀閩粵悉爲賊踞人謂撤藩實速之生變爲持議者危之聖祖嘗諭廷臣曰朕自少時以三藩勢焰日熾不可不撤豈因其叛諉過於人耶及逆賊殄平聖祖追憶持議諸臣猶諭稱米思翰弗置子四第四子李榮保襲一等男兼一雲騎尉初任侍衛兼佐領遷護軍參領前鋒參領至察哈爾總管乾隆元年馬齊疏陳米思翰勞績得旨入祀賢良祠二年以冊立皇后彝典追封李榮保一等公予其第四子富文一等侯爵十三年冊諡孝賢皇后推恩先世追封米思翰一等公以富文襲十四年李榮保第十子大學士忠勇公傅恆經略金川功成凱旋賜建宗祠春秋致祭自哈什屯始米思翰李榮保並入祀追諡李榮保曰莊愨

# 巴泰

巴泰漢軍鑲藍旗人姓金氏天聰五年任二等侍衛從太宗文皇帝征明圍大凌河城明兵自錦州趨援我師與迎戰侍衛尼雅漢中傷墜馬巴泰馳入敵陣援之以出六年從征明大同敵馳射我參領席特庫巴泰突前衝擊敵遁走崇德元年隨睿親王多爾袞征明至沙河生擒哨騎一斬九人獲馬八我偵敵者至楊村爲敵所困巴泰馳擊斬其一人敵潰走旋師出邊率十人偵敵三屯營敵有奪我馬馳者巴泰追斬之取馬以歸六年隨鄭親王濟爾哈朗征明錦州敗其總督洪承疇兵比還巴泰殿後敵追者猝及面中流矢仍躍馬揮刃斬一人敵乃卻上嘉其善戰併錄前勞授雲騎尉世職尋擢一等侍衛世祖章皇帝順治二年以勞績久著晉世職爲騎都尉尋遇恩詔加一雲騎尉時睿親王攝政內大臣索尼侍衛巴哈護軍統領鼇拜並以弗附睿親王坐罪罷任降罰有差巴泰亦弗附睿親王王問以鼇拜索尼相善否巴泰對弗知又問爾與索尼善否對曰我二人同直相善於是罪以僞稱弗知削雲騎尉世職並罰鍰世祖既親政復世職屢遇恩詔晉至二等輕車都尉十五年命列散秩大臣旋擢內大臣聖祖仁皇帝康熙三年擢國

史院大學士賜敕嘉其曩日不附睿親王克抒忠悃晉爵三等男六年充纂修世祖實錄總裁官時鼐拜輔政惡巴泰不附己曾以輔政大臣蘇克薩哈論事齟齬構陷其罪集衆定讞慮巴泰有異議弗使與聞七年二月巴泰以疾解任八年五月鼐拜獲罪逮繫上召巴泰授祕書院大學士仍充實錄總裁官九年十一月改內院爲殿閣以巴泰爲中和殿大學士兼吏部尙書又賜敕嘉其忠盡勤勞晉爵一等子十一年以實錄告成賜銀幣鞍馬加太子太傅十三年以疾乞休詔解任調理十四年命仍入閣辦事十六年七月引年乞休奉旨卿以年邁請休情詞懇切准原品休致念卿宣力有年清端勤慎以朕所御冠服特賜與卿用旌老臣昭朕始終眷念十九年復起爲正黃旗漢軍都統二十三年乞解任得旨俞允仍命以內大臣銜與朝請二十九年卒予祭葬如典禮諡文恪子蘇赫襲爵

佟國印

佟國印漢軍正藍旗人父佟恆年以驍騎校隨其從父佟養正守朝鮮界之鎮江城太祖高皇帝天命六年守城中軍陳良策叛執養正投明總兵毛文龍恆年亦被執不屈死贈騎都尉世職以弟成年襲尋卒佟國印襲職太宗文皇帝崇德三

年授工部副理事官六年隨睿親王多爾袞征明圍錦州與都統石廷柱擊敗李洪步兵上尋親統大軍進征圍明總兵洪承疇於松山敵兵有逸入高橋南三臺者國印與都統劉之源以礮攻克之盡殲其衆七年四月鄭親王濟爾哈朗等圍杏山塔山國印俱以礮擊其城下之敘功加一雲騎尉尋遷工部理事官奉命同副都統馬光輝等赴錦州督鑄神威礮十月隨饒餘貝勒阿巴泰征明由黃崖口入邊時明將於沿邊設臺分兵防守甚密而國印同都統李國翰屢擊敗敵衆克邊臺七又擊敗牆子嶺守兵八年鄭親王征明寧遠既克中後所進取前屯衛國印以紅衣礮擊其城風迴礮火傷領下創甚攻城益力卒克之世祖章帝順治元年敘功晉二等輕車都尉三年擢工部右侍郎七年九年三遇恩詔晉爵三等男十二年以疾解任康熙十一年四月卒賜祭葬如例子佟世德初因國印乞休襲爵尋授參領康熙十三年擢正藍旗漢軍副都統十四年八月隨貝勒洞鄂征叛鎮王輔臣於平涼賊衆迎拒世德同都統海爾圖率兵擊卻之賊復倚山據險列陣世德率兵直前衝擊破賊陣追斬甚衆十五年同前鋒統領穆占設伏於平涼之南山擒賊偵卒擊敗賊騎百餘賊將屢糾衆來犯世德率兵五戰皆捷復以

紅衣礮擊毀賊壘殲賊無算尋招降王輔臣及其叛黨陳彭等並在事有功十七年五月命隨撫遠大將軍圖海規復漢中興安十九年五月卒於軍賜祭葬如例子銓襲爵

杜篤祐

杜篤祐山西蒲州人明崇禎舉人世祖章皇帝順治二年授延安府推官五年行取授戶科給事中七年疏言各省錢糧總歸戶部我朝定鼎七年以數千萬金錢任部臣之出入從無一疏奏銷年復一年互相隱卸臣職司部垣屢催通州坐糧廳收發漕糧清冊久不造報一事如此其餘可知請敕循舊例年終逐一奏銷以杜蒙混又司官出差期滿必經堂官考覈題准回部管事方許另差乃有揚州鈔關主事張彥珩甫屆報滿戶部不行考覈輒題管大迤橋糧務專擅違例並請旨嚴飭疏下內院及吏部察議尋議錢糧雖有冊檔可據不依例奏銷實爲怠玩司官差滿未經考覈不應題差戶部諸臣降罰有差八年四月命赴山西齎頒恩詔還奏沿途目擊達賴喇嘛等自直隸赴山西遇大雨泥濘車輛遲滯夫馬苦遭鞭撻以致驛夫斃命者六人倒斃馬騾共十九匹應請旨敕理藩院嚴飭嗣後滿漢



奉差官員如有額外需索苦累驛遞各撫按指名劾奏治罪下部議如所請八月  
充山東正考官九年七月遷吏科給事中十二月疏劾左都御史房可壯自任總  
憲不能秉公糾駁惟以無益條陳苟且塞責大計在卽舉劾尤宜公正難容尸位  
素餐請賜處分上命可壯回奏奏上篤祐復劾其疏詞支飾可壯乞休歸事詳房  
可壯傳十年三月篤祐疏言前明詔天下戶口編造黃冊所以定賦役覈隱漏清  
逃亡爲法甚善今賦役豈無溷冒戶口豈無凋零奸民豪戶豈無飛派貪官污吏  
豈無挪移況窮民之失業者累及里圖紳衿之優免者加諸貧弱請查照前明舊  
例斟酌行之其過割之影射作何清剔審編之隱瞞作何釐正戶口之倒絕作何  
開除流移之就居作何安頓務將丁糧戶口編輯全書以重民命上以奏有可採  
下部議行十一年三月遷戶科都給事中四月疏陳清釐關弊四事一關員例以  
一年報滿而吏員積年不換把持既久索端愈工宜令役滿者通行裁革一商稅  
止聽各關報銷無憑稽覈請別立稅票分給商船徑投所在官司按票造冊送部  
磨對以杜侵欺一各關主事宜迴避本籍豫絕弊端一差滿繳批毋得逾限逗遛  
滋事下部議從之是月又言通政使准過狀詞請敕部速結以伸冤抑又因直隸

灤城等州縣奉詔蠲免錢糧仍私自徵收請敕各督撫清查被災戶口提驗各戶由單會送部科磨對使貪官藏奸無所並從之五月疏言直隸報銷國課本以防奸詎里書指名攤派牧令復借稱上官經承使費上下分肥至贓敗被參累民已甚上曰銷算錢糧攤派使費急宜痛革其酌定畫一之規以除民害尋九部議州縣逐年分晰款項備造清冊由司達部不得派費滋弊苦累小民并諭各督撫嚴飭行八月升太僕寺少卿十三年四月遷左通政六月遷宗人府府丞十月擢戶部侍郎明年丁母憂歸十五年服闋補原官十六年三月諭獎勤勞奉職諸臣加篤祜太子少保聖祖仁皇帝康熙四年調工部侍郎七年轉吏部九年三月擢都察院左都御史五月因御史季振宜劾吏部尙書黃機以降級侍郎蒙混開列升授尙書下都察院及吏部議以篤祜前任吏部侍郎時與尙書瑪希納等徇庇不舉應降級得旨寬免十一月疏言降級革任人員不論有無冤抑甫經離任卽具呈辨復不足以清銓法疏下部議禁止十一月以京察屆期上言八法處分應詳註劣蹟無得混稱不孚衆論又六科向無堂官止令本科掌印開送恐有瞻徇應移送吏部都察院堂官考察皆下部議行明年二月乞休命以原官致仕尋卒於

家

對喀納

對喀納滿洲正藍旗人姓鈕祜祿氏世祖章皇帝順治二年由內院筆帖式遷工部主事九年遷郎中十一年遷刑部啟心郎十五年裁缺十七年補都察院左副都御史十八年二月遷刑部侍郎康熙五年擢本部尙書六年五月聖祖仁皇帝詔臣工指陳民生利病對喀納同尙書郝惟訥侍郎麻勒吉等疏言賣身旗下之人每與民間構訟或本主爲之代告稱妻子寄居其家田宅財物坐落某處某某借銀若干類多捏詞索詐株連無辜竊思有銀有產之人豈肯賣身亦無存留妻子而獨賣己身之理請嗣後通飭八旗及直隸各省遇此等捏詞概不准理庶狡徒稍戢民生得安疏入從之七年九月授國史院大學士充世祖章皇帝實錄總裁官八年七月諭曰刑部事務殷繁人命所係必得才猷練達之人方克勝任大學士對喀納諳練刑部事務著加太子太保以國史院大學士管刑部尙書事九年以內三院爲內閣對喀納改文華殿大學士會吏部尙書馬希納解任調對喀納管吏部尙書事十一年七月副都御史李之芳疏言部院官失察胥役犯賊應

如州縣例革職吏部以部院官員例不關防胥役寢其事上以京官雖與外官有閒不應迥異下九卿科道會議尋議外官改罰俸一年京官應罰俸六月得旨申飭令再議諭責對喀納曰衙役作弊小民受害無窮所司官理應從重處分以清積蠹今爾等俱已富貴不念小民困苦惟恐重處屬員致有干涉初議京官不應處分繼議外官亦從末減明係瞻徇朕擢爾吏部尙書自應殫心爲國矢公報效乃全無主見殊負委任之意於是定議外官處分仍舊部院司官失察吏役犯贓不及十兩者罰俸一年過十兩者降一級留任十二年六月疏言舊例各省司道府州縣召募經制書辦典吏攢典等役恐積久弊生一歲一次轉撥約有數萬人甚爲繁擾且致文冊生疏每多舛譌遺漏請照督撫鹽院衙門之例五年役滿停其轉撥得旨允行十三年二月以病乞休溫旨慰留十四年九月卒於官年五十七有七賜祭葬如典禮諡曰文端

傅達禮

傅達禮滿洲正黃旗人姓吳雅氏由主事洊升員外郎郎中康熙六年授內祕書院侍讀學士十年正月改翰林院侍讀學士二月充經筵講官尋又充日講起居

注官十二月擢學院學士兼禮部侍郎諭曰翰林院起居注職任重大關係機密  
朕以爾才品優卓實可信任故行簡用爾其勉以副朕意十一年正月教習庶  
吉士先是上命儒臣繙譯大學衍義是年七月告成傅達禮奏請刊頒得旨允行  
十二年四月諭曰滿漢文義照字繙譯可通用者甚多後生子弟漸致差謬爾任  
翰林院可將滿語照漢文字彙發明某字應如何用某字當某處用集成一書使  
有益於後學此書不必太急宜詳慎爲之務期永遠可傳方爲善也後書成賜名  
清文鑑五月教習庶吉士七月重修太宗文皇帝實錄充副總裁八月命同禮部  
侍郎哲爾肯往雲南經理吳三桂撤藩起行事宜諭曰因爾等遠往雲南料理遷  
移事務特賜朕所佩刀各一口良馬各一匹十一月三桂反被留十三年大兵由  
湖廣進剿三桂釋傅達禮等還上嘉其不屈於賊仍以原官用十四年以經筵講  
章不稱旨罷尋卒

### 朱國治

朱國治漢軍正黃旗人世祖章皇帝順治四年由貢生授固安知縣洊擢順德知  
府霸昌道十五年內陞大理寺少卿十六年四月遷大理寺卿十一月擢江寧巡



撫明年春劾布政使陳培正庸劣累民罷之時海賊鄭成功盤踞外洋出沒江南濱海州縣國治疏言鄭逆未靖欲破狡穴先度形勢賊衆負險我師遠涉風濤其勞逸不同賊衆熟識海道我師弓馬便捷其素習不同水師舟楫較之賊船大小懸殊其攻取器用不同臣謂以守寓戰凡海邊江口多設墩臺待賊勢困援絕乘閒攻之自能擒渠獻馘下所司議行十八年疏言海防緊要請移蘇州海防同知於常熟移松江海防同知於上海各令其督修沿海橋梁馬路墩堡與各營汛將弁相機策應使任專而事無歧誤從之又疏言蘇松常鎮四府錢糧抗欠者多因分別造冊紳士一萬三千五百餘衙役二百四十人敕部察議部議見任官降二級調用衿士褫革衙役照贓治罪有差時妖言惑衆吳縣有潘應祥等溧陽縣有端應用等國治先後捕誅之康熙元年丁父憂不候代歸部議擅離職守革職聖祖仁皇帝既親政詔起用十年補雲南巡撫時吳三桂以平西王留守滇南收畜亡命潛謀不軌十二年七月詭請移藩錦州上念三桂久握重兵恐滋蔓生變特允所請遣侍郎哲爾肯學士傅達禮至雲南經理其事三桂期以十一月二十四日啟行國治方疏請增設驛堡協撥夫馬以待遷移而三桂與逆黨胡國柱夏國

相馬寶等密謀叛逆舉兵扼守關隘先期三日邀國治及按察使李興元雲南知府高顯辰同知劉崑脅之叛皆不屈國治罵賊尤烈遂遇害十二年雲南平上命驛送國治櫬及家屬回京二十一年諭曰朱國治當逆賊吳三桂反叛之初抗不從逆遂被殺害捐軀殉難深爲可憫其從優議卹乃加贈戶部右侍郎賜祭葬如典禮廕一子入監世宗憲皇帝時入祀昭忠祠

甘文焜子國城和善等

甘文焜其先江西豐城人後遷瀋陽父應魁從世祖章皇帝入關隸正藍旗漢軍官至石匣副將文焜由兵部筆帖式累遷禮部啟心郎聖祖仁皇帝御極改大理寺少卿康熙二年遷順天府尹六年正月授直隸巡撫先是左都御史郝惟訥以督撫親莅屬邑官吏因緣派累民間奏罷巡歷例七年六月文焜疏言巡撫不巡視屬邑則吏治民隱無由悉知如巡撫不賢圖潤私家雖坐守一城而苛屬擾民之事正多若果賢必自愛名節減省從役絲毫不以累人而年歲豐歉民間利病有司貪廉悉無遁情請仍敕令巡視但申嚴苛擾禁例則不肖之人知儆而實心任事者得盡職守疏下部詳議部臣執郝惟訥前奏寢其事上曰各省遇有水旱

等災督撫減省從役速行履勘庶不至顛倒輕重且可察訪貪官蠹役重加懲治於苦累兵民之事驗時卽行更改其允文焜請著爲令九月文焜疏報履勘涿霸安祁等州大興高陽文安武清東鹿清苑等縣田地數萬頃秋雨爲災請全蠲歲賦已征夏稅流抵來年部議按例減免有差得旨朕聞保定眞定二府及霸昌道所屬州縣被災特甚勘報十分九分者其盡行蠲免內有已征者流抵來年文焜復劾昌平順義懷柔密雲交河各州縣官遲報水災得旨下部處分如例會總督白秉真以賑費浩繁請聽官紳等輸納銀米文焜輸銀三千助賑議敍加銜工部侍郎旋擢雲貴總督八年五月受事奏禁各驛站於額設夫役外派民協助時吳三桂鎮雲南雲貴總督駐貴陽三桂欲藉邊釁以固兵權詭報土番康東入寇又陰趣凱里諸苗煽亂羽檄交馳以覘文焜措置文焜料康東無能爲患凱里近在肘腋不制恐滋蔓難圖先督兵進剿擒斬無算連破賊巢遣副將冷秉忠搜剿阿魯山陣斬賊酋阿戎餘黨悉平乃以進剿康東師期移檄雲南而三桂果以康東遠遁來告文焜尋以滇疆遼闊疏請巡視因徧歷各府州十年三月疏言滇黔山路崎嶇且多瘴癘官員卒於任者請給勘合由驛歸櫬疏下部議行七月以病求

罷上溫旨慰留九月丁母憂命在任守制十一月臻剖逆苗阿福倡亂文焜遣兵  
擣其寨陣斬千餘人擒阿福誅之文焜再疏乞歸葬許給假治喪十二年十月還  
貴陽任事時方允三桂撤藩之請三桂期以十一月二十四日起行陰結黨羽謀  
反先期三日戕雲南巡撫朱國治分遣逆黨偪貴陽文焜聞變卽繕疏遣族弟文  
炯齎馳入告復致書川湖總督蔡毓榮趣其集兵沅州聯絡楚黔聲援先是文焜  
回京治喪三桂請以總督印付雲南巡撫署理假訓練爲名盡調督標弁兵赴滇  
厚結之至是煽誘潰散莫聽文焜調遣文焜旣牒提督李本深領兵扼盤江上流  
以拒賊適本深以書來覘文焜意中多遁辭文焜復爲手書答之略曰黔省安危  
責在提督逆賊受國厚恩罔思圖報乃弄兵一隅自取滅亡我輩忠孝自矢建樹  
正在今日尙其同心協力手足相依萬一不濟惟有效張巡南霽雲以身殉國斷  
不稍存攜貳也本深得書弗顧竟踞安順府從逆貴州巡撫曹申吉亦降賊文焜  
見城中將吏無一可與謀者度貴陽不能守惟鎮遠地勢險阻外可號召荆楚之  
兵內可抗捩滇黔之隘堵遏凶鋒力圖剿滅猶事之可爲者因令妾盛氏率婦女  
等七人自經死卽輕騎馳赴鎮遠至則守將江義亦已從逆文焜至吉祥寺江義

以兵環之文焜歎曰封疆之臣當死封疆事至此無能爲矣整衣冠望闕再拜遂自刎死年四十有二第四子國城及筆帖式和善雅圖從死焉後數年吳逆旣平貴州巡撫楊雍建疏陳文焜滇黔政績及遇賊死節事得旨甘文焜總督雲貴供職勤勞吳逆反叛捐軀殉難忠節深爲可憫下所司優卹並允直隸巡撫于成龍請遣其長子宣化府同知國均迎櫬還京至之日遣大臣迎奠於盧溝橋贈兵部尙書賜祭葬如典禮諡忠果廕子國璧入監二十五年貴州巡撫閻興邦以士民請建專祠於貴陽入奏御書勁節二字額其祠世宗憲皇帝時以文焜入祀昭忠祠

范承謨

范承謨漢軍鑲黃旗人大學士范文程第二子也初任侍衛順治八年更定八旗漢軍考試之例承謨中式舉人明年成進士選庶吉士授弘文院編修十二年遷祕書院侍讀學士十八年聖祖仁皇帝御極擢國史院學士康熙三年以疾乞假尋補祕書院學士教習庶吉士充纂修世祖章皇帝實錄副總裁官七年授浙江巡撫九年杭州嘉興湖州紹興諸府被水承謨奏貸藩庫銀八萬兩糴米湖廣以



平糶應徵漕米請每石折銀一兩於明年麥熟後徵解其白糧分三年帶徵被災重者如例蠲免並得旨允行先是寧波金華衢台溫處諸府屬荒田以前任總督趙廷臣請除額賦有旨令承謨履勘至是承謨徧歷其地奏豁免荒田地二十九萬四千六百餘畝水衝缺額田地二萬一千九百餘畝十年以疾請解任命乘驛回京調理浙江總督劉兆麒提督塞白理各疏言浙省年來當荒歉時而生民不致重困者皆撫臣承謨之力今以病請告百姓投詞攀留積一百五十餘紙不敢壅於上聞給事中姜希轍柯聳御史何元英等亦言承謨受事三載愛民如子餽遺請謁不通劾奏貪墨廉治巨猾剔除加耗陋規私派積弊單騎勘荒悉心賑恤浙人愛戴深於飢渴今雖積勞致疾懇特敕勉留上諭吏部曰前因浙江巡撫范承謨以患病具奏准其回京調理今據提督等奏稱百姓愛戴號泣請留情詞懇切特順民情仍留原任十一年八月承謨疏言浙省徵輸白糧其加耗多寡不一湖州每石加五斗五升嘉興每石加八斗爲運丁春辦諸費請嗣後令糧戶以春白米輸納概限加耗四斗五升又請豁台溫二衛康熙九年以前荒逋銀兩及石門平陽未完輕齎月糧等項皆下戶部議行十月擢福建總督承謨以海疆重任

難副辭上弗允因疏請陞見十二年七月至京召對承謨舊疾未痊上遣御醫診視賜藥餌逾月疾稍愈命馳赴新任賜冠服鞍馬遣侍衛烏丹傳諭曰爾向有賢聲與他人不同且福建邊疆重地海氛未靖爾其益加勉勵副朕委任初福建總督駐漳州至是將撤靖南藩屬還京特命移駐福州承謨奏攜其家屬賜蒙古壯勇八十餘人以行甫抵任聞逆藩吳三桂反承謨察耿精忠有異志綜計督標兵少又與精忠所部習不足恃乃疏言閩省經制兵自康熙八年依部議裁汰已及三千餘名尙應裁二千五百餘名見在兵單汎廣請暫停裁汰遇缺以投誠人充補又請巡行海濱酌寬邊界令民開墾分遣鎮兵屯糧隙地以裕軍餉疏上未及行精忠已叛先佯言海寇至邀承謨議事巡撫劉秉政陰附精忠促承謨行承謨知有變左右請擐甲以從承謨曰衆寡不敵備無益也乃坦然按轡至則逆衆蜂屯露刃承謨挺身前抗辭罵賊精忠困以桎梏閉之隘室晝夜防伺甚密使毋死承謨罵不絕口一日精忠遣秉政說之降承謨奮足蹴秉政仆地叱左右掖出口賊誅戮將不遠茲先褫其魄矣爲賊困踰二年冠賜冠衣辭母時衣每朔望奉時憲書一冊懸之北面跪拜閒爲詩文以桴炭畫壁上當承謨甫爲賊困時部曲有

張福建者手雙刀奮呼奪門連斃賊人力竭被執死又蒙古人嘛尼爲僞散騎郎精忠遣之守承謨感承謨忠義謀使出走事洩精忠將磔之嘛尼大言曰吾寧與忠臣俱死不願與爾逆賊同生及大兵破仙霞關精忠將降節辭冀免死忌承謨暴其罪惡夜遣逆黨偪承謨就縊幕賓無錫嵇永仁會稽王龍光華亭沈天成從弟承譜及親屬家丁隸卒五十三人並遇害賊移屍焚諸野泰寧騎兵許鼎乘夜負承謨燼骸藏之明年櫬還京上遣內大臣侍衛奠酒福建巡撫楊熙疏列精忠叛後死事諸臣爲承謨請優卹總督耶廷相復專疏言承謨於康熙十三年三月精忠邀以會商公事脅之從逆承謨憤怒不屈遂遭羈繫至十五年九月十六夜半精忠遣人縊之承謨猶言主恩未報整衣冠叩首然後就縊親屬幕賓及隨從諸人盡被賊縊死閩人追思其任總督時多愛民惠政聞遭慘變每酸心掩泣言之其純忠勁節久而愈堅富貴榮利不能動其心妻子昆弟不足縈其慮視倉卒遇變激烈捐軀者更未易多得乞敕部優加贈諡卹廕並於閩省立祠褒示以慰人心詔所司優議贈兵部尙書加太子少保廕一子入監賜祭葬如典禮諡忠貞御書碑文賜其家三十四年福建巡撫卞永譽以士民籲建專祠於福州入奏御

書忠貞炳日以額其祠四十七年承謨子時崇官廣東巡撫復疏述前福建督撫爲嵇永仁等請贈部臣以生員無贈銜例寢議乞特敕追贈入祠於是贈嵇永仁王龍光沈天成范承譜國子監助教學正有差並從祀承謨祠世宗憲皇帝時以承謨與嵇永仁等入祀昭忠祠承謨所著有吾廬彙浙閩奏議百苦吟畫壁集聖祖仁皇帝又嘗允時崇請御製承謨畫壁集序曰朕惟帝王教化首重名節所以維繫人心扶樹綱紀也古人臣以身事主守土膺疆或遇蝥賊潛生豺狼勃起則捐軀矢志取義成仁而其激烈慷慨之氣閒發爲文辭雖質直無華後世論錄終有不可泯滅者以其出於忠義之誠本乎性情之正也福建總督范承謨名臣之子授節閩海方值逆豎盜兵徧隅煽燄籌略未展橫罹幽繫閱三寒暑貞操彌堅故其矚然不滓之志縈紆鬱屈無所摠露乃以牆壁爲書箋以桴薪爲筆墨題分甲乙字辨衡從日月既深篇章漸積名曰畫壁記實也卒能終始不撓歸於正命若承謨者可謂冒白刃而不疑守丹心而自信者矣夫以茹荼含蘖之餘每念不忘君父故詩文不必盡合於古之作者而浩然之氣流行充溢當其胸填聲咽髮植風生土塊灰丸同於利劍秃毫斷梗等比霜矛寫忠孝之性靈奪姦凶之殘魄

是又豈刻雕藻繪塗飾虛浮者之所能及乎自二逆既滅寰宇謐寧卹典類加恩綸屢降固已延賞後昆光賁泉壤矣茲特允其子時崇所請復爲序其存彙蓋善善從長春秋之義弁章特錫數出非常庶幾追妥忠魂亦以風厲臣節焉

### 馬雄鎮

馬雄鎮漢軍鑲紅旗人總督鳴佩子也順治十三年由廕生授工部副理事官累遷宗人府啟心郎都察院左僉都御史國史院學士康熙八年授山西巡撫未之任改廣西巡撫時左江奸民楊其清等妖言煽衆謀不軌右江妖僧假明宗室爲亂羣盜莫扶化等結犗蠻掠梧州平樂二府雄鎮悉討平之疏請定邊俸升遷之例除兵糧運費之徵皆得旨允行十二年逆藩吳三桂反明年二月廣西駐防將軍孫延齡叛應之殺都統王永年等刼巡撫廨署時巡撫無標兵雄鎮督家人拒戰移檄梧州趣提督馬雄率兵赴援雄遷延不至而延齡脅降甚急雄鎮自經爲家人救免卽以蠟丸馳疏請兵延齡偵知繫雄鎮及家屬四十餘人於別室絕食數日不死吳三桂遣使招之雄鎮麾其使誓不屈先是慶陽知府傅宏烈以豫發吳三桂逆謀坐誣謫戍蒼梧至是勸延齡反正延齡躊躇未決雄鎮遣其子世濟



世永孫國楨先後由閒道歸京師復疏言廣西人心不甘從逆若大軍速至可圖恢復廣西既復則三桂腹背受敵矣十六年十月三桂遣從孫世琮殺延齡擁雄鎮至賊壘誘降雄鎮大呼曰吾奉命巡撫廣西義守封疆恨不能斬汝首以報國今討賊不遂死吾分也賊狀其幼子世洪世泰以懼之雄鎮罵益厲遂遇害從者馬雲皋唐進寶等九人咸引頸受刃時雄鎮年四十有四妻李氏妾顧氏劉氏女二及世濟妻董氏妾苗氏同日自縊死幕客孫成陳文煥乘閒脫走由平樂達蒼梧以雄鎮所著擊笏樓遺藁及彙草辨疑歸之世濟明年傅宏烈爲廣西巡撫疏述其事聖祖仁皇帝嘉雄鎮忠烈下所司議卹方雄鎮之遣世濟行也全州人易友亮實導之出及世永國楨之行年俱幼賊伺之甚密友亮復以州人唐守道唐正發謀穴垣出之雄鎮既遇害友亮收其骸骨藁葬焉至是世濟恩授大理寺少卿易友亮唐守道唐正發授遊擊守備孫成陳文煥授同知知縣有差十八年世濟請赴廣西收父骸骨得旨馬雄鎮當逆賊叛亂之時克篤忠貞捐軀殉難其骸骨令馬世濟馳驛往取明年雄鎮喪至京師贈太子少保兵部尙書賜祭葬如典禮諡文毅廕一子入監李氏董氏各以夫品級予誥贈又允廣西巡撫郝浴請建

雙忠祠於桂林祀雄鎮及後爲逆孽吳世璠所害之巡撫傅宏烈二十一年正月  
宴羣臣於乾清宮以世濟爲殉難撫臣子特命至御座前賜酒時世濟官光祿寺  
卿旋擢副都御史累遷吏部侍郎貴州巡撫漕運總督世宗憲皇帝時以雄鎮入  
祀昭忠祠乾隆十六年上念雄鎮爲國效忠前此未有世職特予恩騎尉世襲罔  
替以其四世孫馬升基襲

高天爵吳萬福等

高天爵漢軍鑲白旗人後改隸鑲黃旗先世居鐵嶺父尙義以隨征松山杏山及  
太原功予二等輕車都尉世職任杭州駐防協領天爵初由廕生於順治四年任  
山東高苑知縣考滿遷河南信陽知州十一年以經略洪承疇薦擢湖廣長沙知  
府大兵進剿明桂王朱由榔天爵理餉濟軍十三年因父病假歸十六年補江西  
建昌知府先是廣昌縣山賊王昂傅勝幸連升周由義陳太守蕭來信夏登選等  
聚黨數千時出劫掠踞羊石滴水二砦爲老巢形勢險峻官軍仰攻輒爲賊滾木  
礮石所損傷因罷攻招之降王昂傅勝佯就撫仍伺隙煽亂官軍擒之斃於獄餘  
賊益負固抗拒十八年五月天爵與巡道張永祺參將王之任議乘風雨交作漂

流樹木衝斷橋梁賊俱歸巢後分布官軍絕賊出路直擣滴水砦進攻羊石砦斬賊千餘盡毀賊巢賊傷斃及墮巖死者無算生擒幸連升周由義陳太宇蕭來信夏登選及王昂之父王尙智並斬於軍賊所掠丁口悉遣還其家巡撫張朝璘疏報十年砦賊一旦掃除由道府區畫周詳捐貲懸賞鼓勵士卒冒險奏功詔下部察敘天爵得軍功加級康熙十三年逆藩耿精忠據福建叛縱黨入江西犯建昌時天爵已遷兩淮鹽運使或勸之速行天爵曰吾守此土十六年雖受代豈可遽離遂率家丁數十人禦賊萬年橋城守副將趙印已降賊乘天爵力戰從後縛之以獻賊載送入閩再四誘降終不屈賊拘繫之越歲餘天爵與副將王進武舉胡守謙把總楊起鵬姜山等同謀遣千總徐得功出仙霞嶺請大兵入關陰結死士爲內應賊將王廷彥訐之耿精忠遂以十五年九月四日遇害十九年福建巡撫楊熙疏列同日殉節諸人部議卹廕有差天爵得旨贈太僕寺卿廕一子三十五年福建巡撫卞永譽請以天爵與原任福寧總兵吳萬福福州知府王之儀邵武知府張瑞午建寧同知喻三畏邵武同知高舉侯官知縣劉嘉猷尤溪知縣李塤福州城守千總廖有功等合建一祠於省城西門外春秋致祭得旨允行四十四

年子其佩官工部員外郎爲父請扁御書盡忱義烈以額其家祠四十六年其佩官浙江溫處道復爲父請諡賜諡忠烈雍正四年長子其位官大學士其佩官都統同奏請諭祭得旨高天爵捐軀盡忠大節可嘉高其位高其佩乃見任大學士都統大臣爲父請卹甚是著加禮部尙書銜追賜卹典七年入祀昭忠祠

希爾根子喀西泰

希爾根滿洲正黃旗人姓覺爾察氏世居長白山太宗文皇帝在藩邸時希爾根任護衛太祖高皇帝天命十一年春蒙古巴林部貝勒囊努克背盟刼掠大軍進征攻其塞囊努克挾數騎遁希爾根將追及馬蹶易馬突前擊潰敵騎太宗遂射殪囊努克自是屢從征討有功授騎都尉世職崇德元年大軍征明分克昌平寶坻順義密雲東安文安定興安肅容城安州雄縣等邑希爾根任護軍參領擊敗明太監高起潛兵擒其總兵巢不昌又助都統譚泰設伏敗三屯營騎兵師還敵躡我後諸將護輜重先行希爾根獨以軍殿敍功超授一等輕車都尉世職二年四月隨大軍攻克明皮島九月上將行圍選從行者希爾根之父雅賴以佐領與選希爾根因己亦從行啟睿親王多爾袞乞免其父不許乃使人告都統譚泰謂

雅賴已免令珠爾堪代之及獵上以珠爾堪不宜與選詰問侍衛索尼奏曰與選者雅賴希爾根給言已見行故代以珠爾堪遂下法司鞫勘希爾根坐欺罔應革世職罷參領任得旨從寬罰鍰五年隨睿親王圍明錦州我師據山岡列營明兵來攻擊走之復敗松山援兵尋以圍錦州時擅離軍伍及言事不實論罰鍰停止敘功七年大兵入黃崖口進圍薊州明總兵白騰蛟率兵馳救希爾根逆擊破敵斬馘無算世祖章皇帝順治二年敘勲舊勞績加一雲騎尉是年隨英親王阿濟格討流賊李自成由綏德州進圍延安府賊攻鑲藍旗營希爾根擊卻其衆賊將一隻虎者恃其勇屢犯我營希爾根三戰皆捷遂至西安同前鋒統領席特庫往躡賊蹤殲賊二隊自成奔湖廣追剿至安陸府賊踞城拒希爾根與護軍統領鼇拜攻克之獲戰艦八十移師武昌擊走賊兵之截我輜重者賊於江濱集艦五百餘將東下都統譚泰督衆往取希爾根先至獲之凱旋敘功晉爵三等男世襲三年隨肅親王豪格征流賊張獻忠與護軍統領哈寧阿阿爾津蘇拜等擊敗賊黨高汝礪武大定等拒戰兵進擊獻忠於西充別趨涪州剿賊袁韜俘斬無算師還部議擊獻忠時哈寧阿被賊圍希爾根弗援妄與阿爾津蘇拜爭功應論死得旨



從寬罰贖降世職爲三等輕車都尉六年隨異親王滿達海征大同叛鎮姜瓖希爾根圍太谷以礮破其城僞知縣李成沛僞都司吳汝器遁追斬之進克大同及長子縣渾源州朔州復招降永寧州嵐縣潞安府等城同都統漢岱攻復遼州山西平晉秩二等尋訴前鐫秩寃得旨授一等輕車都尉兼一雲騎尉三遇恩詔晉爵一等男九年擢護軍統領十年與內大臣額爾克戴青等會奏佐領敦達禮岱敏互訐事下法司翰議削敦達禮世職並罰鍰敦達禮訟寃命覆勘得釋因論法司誤勘及會奏諸臣徧徇罪希爾根降爵三等男尋予復如故擢列內大臣更追敘戰功晉爵一等男世襲康熙十二年聖祖仁皇帝念其宣力有年詔加太子太保十三年三月授定南將軍討逆藩耿精忠師次南昌賊已陷廣信建昌撫州九月希爾根督兵圍撫州賊出城抗拒連敗之復擊走僞都督易明援兵賊待援不至棄城遁僞將軍陳昇連結土賊郭應定等犯贛州希爾根令副都統甘度海參將塞勒等禦戰陣斬僞總兵柯隆李梁追剿至龍泉縣破賊三營又攻取曹林十餘寨十四年擊敗僞將軍邵連登恢復建昌府城移師饒州剿滅餘干浮梁樂平諸邑賊衆先是上命安親王岳樂爲定遠平寇大將軍統師南昌簡親王喇布爲

揚威大將軍統師江寧至是諭趣安親王進征湖南安親王請俟希爾根殲滅饒州廣信賊寇乃規取長沙上以賊渠吳三桂早滅則江西福建之賊不剿自平趣安親王速進詔簡親王率江寧兵二千赴南昌以希爾根爲副將軍協同鎮守十五年三桂糾賊陷吉安踞之希爾根隨簡親王督師攻圍十六年賊遁城下詔簡親王鎮吉安希爾根仍駐南昌以年老召還京十八年五月卒賜祭葬以其孫尙世特襲爵希爾根之子喀西泰任護軍參領當吳三桂初反時隨前鋒統領穆占進征四川遇賊將王屏藩等於蟠龍山戰方合賊別由水道登岸來犯喀西泰力戰歿於陣

根特

根特滿洲正黃旗人姓納喇氏父達雅里國初來歸以軍功授騎都尉遞加一等輕車都尉卒以其孫達漢泰襲根特初以閒散隨貝勒阿巴泰征明至山東攻泗水縣先登還攻定州先登敍功授騎都尉兼一雲騎尉世職並賜巴圖魯號尋晉三等輕車都尉順治元年授刑部理事官五年三月隨征南大將軍譚泰征叛鎮金聲桓於江西七月大兵薄南昌圍之未下根特由城南繼蒙古兵登城拔之聲

桓中二矢死生擒其黨王得仁江西平師還擢副都統兼管佐領七年九月兩遇恩詔晉世職爲一等輕車都尉康熙十二年十一月逆藩吳三桂叛十三年正月命都統尼雅翰爲鎮南將軍與兗州副都統瑪哈達同赴安慶根特代駐兗州二月上以江西界福建廣東湖南爲三省要地命根特偕副都統席布率兵速赴南昌三月江西巡撫董衛國疏報湖南長沙失守江西袁州吉安二府與接壤請撥兵駐防得旨著根特率現駐南昌兵往相機剿禦尋命內大臣希爾根爲定南將軍帥師赴江西根特參贊軍務四月平南王尙可喜疏言吳逆遣賊二萬屯黃沙河叛鎮孫延齡欲與合請就近撥兵會剿孫逆以分賊勢諭曰根特候希爾根等兵至江西卽率所部官兵速赴廣東是月授平寇將軍會逆藩耿精忠叛於福建詔根特由廣東仍返江西六月衛國疏報叛弁柯昇勾閩賊竊據廣信諸處詔根特先定廣信再偕前鋒統領舒恕由袁州進取長沙七月兩廣總督金光祖疏報廣信梧州失守諭曰根特等率兵由袁州取長沙進廣西以襲賊後則取道廣東必致遲久其與平南王尙可喜總督金光祖提督馬雄會同酌議添撥官兵規取橫州否則固守梧州諸處相機剿禦八月卒於軍二十二年賜祭葬如例子智宏

襲世職

瓦爾喀

瓦爾喀滿洲鑲紅旗人姓完顏太宗文皇帝天聰時任前鋒校每臨陣奮勇爭先  
中創不退屢得優賞崇德二年隨貝勒岳託征明由牆子嶺入邊越燕京趨山東  
攻海澄克其城七年隨饒餘貝勒阿巴泰征明由黃崖口入邊轉戰至山東攻范  
縣衆皆俟雲梯登城瓦爾喀以長槍鑿破城垣爲磴先登克之世祖章皇帝順治  
三年隨肅親王豪格征四川屢擊敗流賊張獻忠兵斬級二十餘生擒賊哨騎十  
人有護軍阿納海者爲羣賊所困攢刃將及瓦爾喀馳騎突前格殺二人援以出  
五年隨副都統烏拉禪駐防大名攻剿土賊於祁州及臨潼關並多斬獲是年敕  
征四川功予雲騎尉世職三遇恩詔洊晉二等輕車都尉九年授工部理事官十  
三年以董修乾清宮成晉三等輕車都尉十五年奉先殿成晉一等輕車都尉十  
六年署前鋒參領隨都統卓洛前鋒統領白爾赫圖等駐防雲南元江土司那嵩  
既降復叛卓洛率兵進剿瓦爾喀督雲梯兵攻克元江城聖祖仁皇帝康熙元年  
還京授參領兼督捕理事官五年遷駐防西安副都統七年擢西安將軍十二年

冬吳三桂反上命瓦爾喀偕副都統佛尼埒率西安官兵馳赴四川防守險隘十三年正月上聞四川巡撫羅森提督鄭蛟麟總兵譚洪吳之茂等並叛附三桂因諭瓦爾喀暨佛尼埒曰爾等久歷戎行素稱諳練朕可無西顧之憂大兵入蜀後吳逆僞屬官兵有來降附者應密爲防閑嚴設巡哨整飭營壘至綠旗已叛官兵爾等相機招撫便宜行之三月瓦爾喀至漢中聞叛賊譚洪等已踞陽平關四十餘里於野狐嶺上下及諸險隘並遣賊黨迎拒瓦爾喀部署諸將分兵三路奮擊潰野狐嶺賊隊並發其伏殲之乘勝疾趨克復陽平關四月攻復七盤關五月攻復朝天關先後奪壕毀寨擒斬賊衆萬餘獲旗幟器械無算上嘉其調度有方命事平日議叙時賊衆堅據保寧我軍距城十里鑿壕塹與相持久未下八月瓦爾喀疾卒賜祭葬如典禮諡襄敏立碑墓道十六年三月議政大臣等追論瓦爾喀進征保寧不乘賊未設備時疾進既至復不簡精兵分守要地致賊劫掠我兵衆又不以實奏報應追奪原官及世職削諡毀碑籍其家詔免籍沒餘如議行

圖喇

圖喇滿洲正黃旗人姓舒穆祿氏世居琿春初任兵部筆帖式太宗文皇帝崇德



七年隨饒餘貝勒阿巴泰征明山東攻泗水縣流矢中目戰愈力攻新泰等城奮  
勇爭先世祖章皇帝順治元年隨豫親王多鐸征陝西二年復隨征江南七年擢  
兵部主事兩遇恩詔予騎都尉世職十二年擢兵部郎中十三年隨都統伊勒德  
征舟山僞伯阮思率巨艦百餘拒戰圖喇與副都統根特擊敗之阮思復糾其黨  
陳六御張洪德等合兵三萬餘犯我舟師圖喇與副都統柯永葵連破其軍圖喇  
中礮傷手足舟山旣平敍功加一雲騎尉十八年山東土賊于七倡亂聖祖仁皇  
帝命圖喇同郎中察奇至棲霞逮鞠賊黨時于七踞棲霞之峒岬山其黨段忠續  
林萬鵬龐應魁高起英各擁衆數千分踞鼇山潛結棲霞城中奸黨爲內應圖喇  
邏獲賊謀二人詰之盡得賊情適靖東將軍濟什哈率師抵萊陽圖喇遣使約濟  
什哈調綠旗兵七百疾馳至棲霞獲城中從賊者三百餘人遂趨鼇山忠續萬鵬  
等聞風遁擒賊黨六十餘獲牲畜以數百計尋偕察奇還京擢大理寺少卿康熙  
二年五月授駐防杭州副都統十月同總督趙廷臣至定海招降海賊鄭錦之僞  
靜波將軍阮美及僞官一百二十餘員兵二千九百餘名七年擢杭州將軍十三  
年三月逆藩耿精忠叛圖喇奉詔與總督李之芳提督塞白理率滿漢官兵相機

防剿尋以都統賚塔爲平南將軍赴衢州禦賊命圖喇駐守杭州兼防海疆六月疏言杭州兵少請增兵協守詔移江南綠旗兵五千駐杭州又疏請杭州增設防禦每旗各一員下部議如所請尋以病還京十月卒賜祭葬如例子明德襲職

### 莽依圖

莽依圖滿洲鑲白旗人姓兆佳氏父武達禪太宗文皇帝崇德三年隨睿親王多爾袞征明攻直隸任邱山東濟陽並先登賜號巴圖魯予騎都尉加一雲騎尉世職任太原城守尉世祖章皇帝順治七年武達禪卒莽依圖襲職兩遇恩詔晉世職至三等輕車都尉十五年隨征南將軍卓卜特征明桂王朱由榔至貴州明年自都勻進師盤江僞晉王李定國據雙河口悉衆爲三十營列象陣拒戰莽依圖率步兵衝擊破之隨大軍定雲南聖祖仁皇帝康熙二年隨靖西將軍穆哩瑪征湖廣流賊李來亨等賊據茅麓山列寨拒守莽依圖冒矢石進攻毀寨二賊大敗來亨自經死凱旋授江寧協領十三年逆藩吳三桂陷湖南莽依圖隨征南將軍尼雅翰率師進剿岳州用紅衣礮擊沈賊舟敗賊七里橋多斬馘十四年三桂遣賊將董重民結廣西叛鎮馬雄犯廣東平南王尙可喜上疏請兵詔尼雅翰率師

至廣東莽依圖以署副都統駐守肇慶十五年可喜子之信叛降三桂受僞爵倡兵作亂三桂賊將范齊韓等逼肇慶總督金光祖降賊事詳光祖傳莽依圖率所部兵突圍出且戰且走還駐江西僞將軍黃士標僞總兵王割耳糾衆犯信豐莽依圖率兵往援與城內兵奮勇夾剿所獲甚多賊遁走入山後追敗之圍遂解十六年三月實授江寧副都統時廣東尙爲賊將董重民等所踞上命莽依圖爲鎮南安僞將軍嚴自明以城降遂偕額赫訥穆成額率師進征南雄僞將軍宋思政僞總兵郭茂威等迎降尙之信亦擒董重民率藩屬歸順莽依圖進韶州五月疏言南安南雄韶州所屬文武官弁昔雖迫於賊勢致污僞職今旣望風款附若悉事更張恐生反側請令暫留原任綏撫殘黎上特允所請且諭獎其進兵迅速六月命翰林院侍讀學士顧八代赴軍前傳諭飭剿逆賊擇便而行時賊將胡國柱馬寶糾賊萬餘犯韶州莽依圖擊卻之九月賊復據河西斷我水運餉道列營蓮花山以瞰城中會將軍額楚率江寧兵至與城內軍夾攻破其四營斬獲甚衆賊敗竄帽峰山我軍乘夜追擊大敗之河西賊亦遁水運遂通十月追擊至樂昌賊

據風門澳拒守我軍三路仰攻別令瑤兵由間道奮擊擒斬賊二千餘乃撫定仁化仍回駐韶州疏言將軍傅宏烈以五千兵獨當西路恐力不支已遣副都統額赫訥赴梧州協剿得旨賊犯韶州將軍莽依圖同額楚夾剿既大敗賊衆復追剿仁化諸縣指顧悉定可謂智勇兼擅凡爲將者統兵滅賊底定疆圉不必一一拱候中旨惟應機適變盡乃心力斯克副委任莽依圖當逆賊甫遁卽遣副都統額赫訥等往援粵西深可嘉尙十七年正月三桂遣其孫吳世琮陷桂林馬寶亦由宜章陷平樂上命莽依圖赴廣西與傅宏烈會師剿賊二月疏言臣抵平樂圍其城賊水陸拒阻宏烈所率綠旗兵與戰不勝臣派軍難以久留因退駐中山鎮宏烈亦以莽依圖所率滿洲兵不相應援入奏上念擊賊失利因江水泛漲並免罪諭令和衷協剿逆賊莽依圖尋以賊逼賀縣回梧州乞罷將軍任上切責之仍留任圖功贖罪明年二月吳世琮犯梧州莽依圖同傅宏烈率師拒戰大敗棄營遁先是僞將軍馬承廕以南寧降至是賊由梧州敗竄糾衆犯南寧六月城中食盡旦夕且陷莽依圖方臥病聞之督師倍道援剿賊悉銳聚新村列鹿角西山拒戰額楚額赫訥引前鋒兵擊之賊稍卻莽依圖與將軍舒恕磨大軍進而預遣左翼

兵潛出山後截賊歸路盡殪之吳世琮負重傷以數十騎越山遁南寧圍解上以廣西底定命進取雲貴九月莽依圖以馬承蔭雖降心懷叵測恐爲肘腋患上言湖南大兵在武岡禦賊臣等一軍先向雲南恐諸路兵不相應援且廣西新定若無兵駐守恐有他虞請暫駐南寧相機進剿上命簡親王喇布鎮桂林莽依圖俟都統希福兵至取路恢復疆土十九年四月授護軍統領五月馬承蔭叛於柳州莽依圖率師進剿次來賓承蔭驅象陣迎戰我軍以勁弩射象回奔賊陣亂乘勝力戰賊大敗棄甲走莽依圖自率輕騎追擊獲象三斬賊甚衆會簡親王與總督金光祖分路剿賊並捷承蔭復降柳州平八月莽依圖卒於軍年四十有七十二二年三月議政王大臣等追論莽依圖征廣西時自平樂退梧州應坐失機籍家產半革去恩詔所得騎都尉上曰莽依圖在行間頗有勞績且屬下兵民俱稱其善凡所過地方亦不擾害百姓可免籍沒削去恩詔所加世職其原襲之騎都尉又一雲騎尉以其子博和哩襲五十九年入祀廣西名宦世宗憲皇帝雍正十年入祀賢良祠乾隆元年追諡襄壯

畢力克圖



畢方克圖姓博爾濟吉特氏世居科爾沁太宗文皇帝時來歸隸蒙古正藍旗任  
豫親王多鐸護衛隨征朝鮮及明錦州屢有斬獲世祖章皇帝順治元年隨豫親  
王追剿流賊李自成於潼關明年定西安移師由河南進拔揚州下江寧畢力克  
圖署護軍參領所至克敵有功四年授騎都尉世職六年擢正藍旗蒙古副都統  
時大同總兵姜瓖叛畢力克圖奉命率兵駐防平陽偕巴圖魯羅多渾剿太平縣  
賊遇賊黨郭中傑引賊衆寇絳州擊敗之又敗賊騎千餘於張湖村七年同西安  
協領根特等率師圍太平城賊負固抗拒逾二旬不下乃因城壕掘地道燃火藥  
以墮其城師入叛賊李建泰及賊黨俱伏誅八年正月兼任禮部左侍郎屢遇恩  
詔晉世職至一等輕車都尉十年四月調戶部左侍郎十一年六月隨靖南將軍  
朱瑪喇征廣東時流賊張獻忠餘黨李定國附明桂王朱由榔由廣西犯廣東踞  
新會縣左之山峪畢力克圖同護軍統領敦拜擊潰其衆復與副都統鄂拜護軍  
統領賴塔攻剿賊巢賊敗竄溺水死者無算乘勝追至興業縣遇僞都督吳三省  
僞總兵楊成王三才等率步賊千拒戰殺過半進抵橫州定國渡江遠竄凱旋敘  
功晉爵三等男十三年以員外郎朱世德司權河西務虧缺稅銀戶部誤援恩詔

赦免部臣俱坐降革畢力克圖罷侍郎任降世職爲二等輕車都尉十七年雲南既平朱由榔竄緬甸李定國與其黨白文選等分踞孟艮木邦上命內大臣公愛星阿爲定西將軍畢力克圖署護軍統領率師赴雲南同平西王吳三桂相機征剿十八年十一月會師木邦定國先奔景線文選遁據錫箔江濱聞我兵至毀橋遁畢力克圖與前鋒統領白爾赫圖等先至江岸獲其謀者大軍結筏渡江越十日次奮挽坡距緬城六十里緬人謀擒獻由榔請大將軍留駐以百人進蘭鳩江濱爲扞衛於是白爾赫圖率前鋒逆往畢力克圖率護軍二百隨其後緬人以由榔獻乃旋軍時白文選爲總兵馬寧等追及於猛養率衆降畢力克圖撫其衆移入邊境聖祖仁皇帝康熙三年敘功晉世職爲一等輕車都尉兼一雲騎尉八年擢正藍旗蒙古都統列議政大臣十二年五月詔以畢力克圖屢從征伐著有勞績加太子少師十四年三月授平逆將軍時叛鎮王輔臣附逆藩吳三桂作亂踞平涼肆掠陝西郡邑上命畢力克圖帥師駐大同尋延安綏德皆陷賊諭進駐榆林畢力克圖既帥師移駐偵知賊衆三千餘屯楊家店渡口乃分兵三隊乘夜疾進黎明鳴角渡河賊不虞我師之至也悉驚駭潰竄遂復吳堡縣城進師虎爾崖

口遇賊衆復擊敗之僞遊擊黃文英僞總兵朱龍俱遁綏德平進征延安賊將李士英等棄城遁畢力克圖令副都統覺和託率兵追擊至宜川俘斬無算自駐延安城招撫附近城邑保安安塞宜川延長安定諸縣皆復奉命移師會揚威將軍阿密達征平涼將至王輔臣驅賊萬餘迎戰畢力克圖督兵合擊陣斬僞總兵郝天祥及賊衆無算距城數里駐營十五年上遣大學士圖海爲撫遠大將軍征平涼命畢力克圖率所部前鋒赴寧夏統轄滿洲蒙古兵防剿圖海至平涼王輔臣降畢力克圖還駐平涼十七年移兵守隴州寶雞諸路賊倚仰天池高山爲巢畢力克圖進兵剿除招降靈臺華亭崇信等縣及僞參將李天秀等三十一員兵二千餘賊復據寶雞縣之蟠龍山分三隊來犯又僞副將胡長骸踞顯義三關山坡列陣拒戰畢力克圖以兵兩路合擊大敗賊衆十八年上以畢力克圖出師日久年已衰邁召還京先是圖海議分兵四路取漢中興安令畢力克圖同提督孫思克恢復略陽至是已進征圖海以奏上命俟漢中興安恢復撤回畢力克圖先取成縣招降僞副將王光生等十九員兵三百六十餘名會提督趙良棟已復略陽與將軍王進寶並定漢中圖海亦定興安遂班師十九年還朝仍任都統二十年

六月卒年七十有二予祭葬諡恪僖孫常遠襲職二十五年追敘陝西軍功晉二等男世襲

額楚

額楚滿洲鑲黃旗人先世居薩哈勒察姓烏扎拉氏世祖章皇帝順治二年內大臣何洛會統師駐防西安道經河南明總兵劉洪起旣降復叛據西平縣城何洛會督兵樹雲梯攻剿護軍昂海先登額楚繼之遂克其城敘功予雲騎尉世職尋授佐領屢遇恩詔晉世職至三等輕車都尉十五年從大軍取貴州明年凱旋隨副都統噶楚哈瑪爾賽至荊門州聞海賊鄭成功犯江寧由大江趨援噶楚哈令額楚爲鑲黃旗營總統江寧駐防兵擊敗賊衆敘功晉世職二等輕車都尉尋授駐防江寧協領擢副都統聖祖仁皇帝康熙七年授江寧將軍十三年逆藩耿精忠叛應吳三桂遣賊將由福建陷江西廣信建昌饒州等府徽州及婺源績溪等縣俱從逆額楚奉詔同署副都統宗室巴爾堪率兵往剿逆賊萬餘於績溪縣西北迎戰額楚督兵奮擊陣斬僞副將一及賊衆三千餘擒從逆把總劉成功斬之復績溪遂復徽州府城賊將踞休寧縣之新嶺倚險立寨額楚分步兵左右擊騎

兵由中路進攻破鹿角毀木柵斬賊五百餘乘勝進剿至婺源賊皆潰遁婺源亦復額楚奉詔征饒州擊賊於樂平縣之段家村斬二千餘級進薄樂平東門前鋒參領巴特瑪樹雲梯登城賊兵五百餘由西南二門出遁額楚遣兵追襲擒斬過半進次鄱陽縣大磯莊賊由雲梯髻峰下來犯額楚遣巴特瑪等列陣奮戰賊敗潰從逆饒州參將陳九傑時爲僞都督棄城遁入鄱陽湖額楚撫定城中人民賊旋由湖中駕船三百來犯額楚督兵射殪三百餘賊以礮擊毀賊十餘船餘賊俱竄遁十四年四月額楚率兵剿賊萬年縣至石頭街渡口遠望隔岸分布賊營十數處賊船二百餘橫踞渡口額楚令步兵直趨渡口集戰艦發槍礮密令騎兵乘夜由上流潛渡繞出賊營後水陸夾擊殪賊數十盡獲賊船陳九傑就擒伏誅餘賊棄城遁賊之在安仁者皆乘船遁我兵追及之賊以風逆泊船拒戰旋自焚其船棄資械奔竄萬年安仁二縣悉平五月剿賊弋陽賊將蔣得軫等率賊五萬於城北樹木柵十有五又以五千餘賊分踞西岡橋額楚分兵爲二攻毀木柵奪取西岡橋賊卻入城我兵登城克之擒斬僞遊擊張三奇僞都司張明德胡中申等先後擊斬及溺水死者二萬餘賊十五年簡親王喇布自江寧移師南昌額楚奉



詔參贊軍務吳三桂賊將高大傑等突陷吉安踞之額楚同將軍哈勒哈齊率兵攻克外城與賊相持賊將馬寶韓大任引賊數萬來援額楚迎戰於螺子山等處屢失利會安親王岳樂自袁州進征湖南圍長沙馬寶聞急趨救吉安賊衆食盡乘夜出南門奔逸上遣侍郎班第察奏螺子山戰敗罪以額楚不能舉發首先敗走之人又賊遁不行追擊罪無可諉應罷任革世職命以世職仍領江寧兵立功贖罪率兵赴廣東十六年九月賊將胡國柱馬寶率賊萬餘犯韶州額楚師次蓮花山賊偪營額楚督兵禦擊會將軍莽依圖自城中出兵夾擊大敗賊賊由帽峰山遁追擊至樂昌仁化詔莽依圖進駐梧州額楚駐韶州十二月諭曰韶州地屬緊要一切軍務額楚若啟簡親王轉奏恐多遲誤其令額楚以江寧將軍印統轄兵馬事許專奏十七年詔同都統勒貝率兵進駐梧州參贊莽依圖軍務時廣東總兵祖澤清復叛自高州句結山海諸賊犯電白額楚奉詔會剿擊卻賊衆進駐藤縣遇大疫士馬多病斃額楚以聞命別擇要地移駐額楚旋疏言吳逆踞鬱林融縣潯州聲言三路來犯藤縣軍營未可動移但士馬缺乏應請增遣以備剿禦上命其仍駐藤縣諭將軍舒恕於南雄韶州兵內擇有馬者發額楚軍未至賊犯

藤縣額楚同巡撫傅宏烈率兵禦擊失利退保梧州賊陷藤縣十八年二月賊將吳世琮犯梧州額楚同莽依圖傅宏烈擊卻之賊併力犯南寧城中食盡時降鎮馬承蔭守南寧遣人告急額楚與莽依圖舒恕勒貝分兵四路趨援擊賊於新村西山之巔斬殪無算世琮負創奔逸南寧圍解額楚駐守永淳十九年六月額楚奉詔還江寧二十年十月卒於任以兄子格克里之次子富努保襲二等輕車都尉世職富努保尋卒以格克里長子法保襲初格克里於康熙十四年以六品從大軍征廣東剿叛鎮馬雄僞將軍董重民等於電白縣戰歿於陣二十五年議卹予雲騎尉世職以法保併襲合已襲之職爲一等輕車都尉

### 莫洛

莫洛姓伊爾根覺羅氏世居呼納赫魯祖温察太祖高皇帝時來歸後隸滿洲正紅旗世祖章皇帝順治七年莫洛任刑部理事官尋改工部主事累遷郎中聖祖仁皇帝康熙六年擢副都御史七年出爲山西陝西總督時陝西災旱頻仍平涼臨洮鞏昌西安延安鳳翔漢中七府及興安一州荒地逃丁額賦無徵者有司率令現存之戶均輸民甚苦之莫洛旣至疏請豁免上從所請八年輔政大臣鼈拜

結黨專權獲罪法司以莫洛素附鼈拜請逮問諭曰莫洛爲鼈拜黨羽應逮問念其任事封疆釐剔加派火耗等弊姑從寬免罪仍留原任九年遇計典吏部遵例甄別各督撫功過以莫洛向曾植黨營私奏聞得旨革職西安士庶聞之相率哀籲懇留甘肅巡撫劉斗同提督張勇柏永馥總兵孫思克等奏言莫洛莅任以來清以持己正以率下如革耗羨整驛遞息詞訟練士卒清荒熟教樹畜興水利善政難以枚舉乞留任以慰民望上曰簡用督撫原欲綏輯地方愛養百姓莫洛既爲民愛戴特順輿情免其處分供職如故未幾擢刑部尙書十三年二月上旣分命王貝勒大臣等討逆藩吳三桂並諭部臣曰吳逆煽亂滇黔四川從逆陝西爲邊陲要地西控番回南通巴蜀幅員遼闊素號巖疆非特遣重臣假以便宜未易綏靖莫洛前任總督深得民心茲特授爲經略駐劄西安軍事悉聽調遣復加銜武英殿大學士仍以刑部尙書管兵部尙書事賜以敕印莫洛至西安策遣諸軍進征五月詔諭莫洛曰朕聞叛鎮鄭蛟麟乞降又聞克復朝天關喜慰殊深頃賊蜂聚岳州值雨甚大兵難行稍俟晴霽卽水陸並進吳三桂果在澧州宜乘虛徑襲其後如克復四川可取道交水以定貴州或徑趨雲南其餘諸將集議尋奏逆

賊堅據保寧川地未能猝復容俟奏捷卽行相機進取并奏防禦關隘輓運軍食  
機宜諭曰朝天關諸隘關係要害可於滿洲漢軍綠旗官兵內酌撥防守相爲犄  
角護送糧艘不爲無助至漢中雖已駐兵猶恐力單且朝天關之外尙有別路可  
通漢中倘我兵深入後奸宄竊發據守鷄頭關諸隘亦屬可虞一切機宜其酌行  
之又保寧未能卽復則我師益致勞頓輓運糧餉實爲要務其源源接濟毋令匱  
乏六月疏報僞副將姚孟龍等繳扎投誠時賊衆負固竊踞廣元所屬百丈關莫  
洛旣遣都統馬一寶將軍席卜臣赴漢中副都統科爾寬赴廣元又慮廣元兵寡  
不敵賊衆令副都統吳國正俟馬一寶至卽移師助之七月上命貝勒洞鄂偕貝  
子溫齊輔國公綽克托率貝子準塔所部驍騎校赴四川莫洛疏陳大兵久駐保  
寧與賊相持秦民運餉勞苦臣今親赴漢中酌量分路進剿貝勒洞鄂若率衆盡  
行慮致遲滯請敕簡精銳先發速至西安上念貝勒所部無多仍令貝子公等亦  
各率所部進發會西安將軍瓦爾喀奏川鎮王懷忠標兵因糧匱逃散請發餉增  
兵救援諭莫洛曰大兵或仍圍守保寧或因糧運艱難暫還廣元其與將軍等酌  
之並命寬王懷忠標兵罪速行撫納八月莫洛復疏陝省兵單請增兵以資戰

守上以增兵必須增餉或不煩增兵或必議增兵或不必親行赴川令詳悉覆奏莫洛言增兵則秦兵得以保固迨四川底定則糧餉有資而秦民亦得休息臣仍宜親統官兵進剿四川上從之九月莫洛將由秦赴蜀請敕總督周有德巡撫張德地暨科爾寬等固守朝天關廣元諸路轉運糗糧並請敕將軍等駐守保寧以待兵至諭曰軍機緩急莫洛自有確見可與將軍席卜臣前往廣元進取昭化總督周有德等於經略未到之先督趣糧米運送軍前又廣元兵少或令席卜臣先赴廣元秣馬以待或與經略同發俱令莫洛酌行十月僞將軍何德成等糾合潰衆分路自四川來犯寧羌先立營於文廟山官兵夜襲賊營賊衆大敗遁回南山上諭莫洛曰寧羌爲大兵後路爾其速援庶幾有濟莫洛因賊已遁敗令提督王輔臣遣兵駐守寧羌十一月貝勒貝子等大兵未至僞總兵彭時亨等復屯踞七盤朝天諸關刦奪略陽糧艘廣元兵缺餉者兩月賊衆旋復窺伺陽平上慮莫洛所統皆綠旗兵巴蜀山路險惡滿洲大兵若不相繼難於策應因敕貝勒洞鄂等兼程而進會同經略進川是月莫洛遂帥兵由漢中赴蜀令提督王輔臣隨征先是莫洛甫至陝有詔調陝西兵征湖南輔臣自請率兵赴荊州上以調征湖南兵



已有貝勒尙書貝子準塔等統領因命輔臣仍駐平涼聽莫洛調遣輔臣心怏怏至是莫洛調之隨征輔臣遂懷叛志佯言部兵少請增撥莫洛給以騎兵二千輔臣少之又以所給馬疲瘠不任用爲詞搖惑衆心遂謀作亂十二月莫洛行次寧羌州駐營王輔臣標兵猝亂襲刼經略營莫洛率兵擊卻之甫定王輔臣忽率叛卒來犯礮矢齊發莫洛被重創歿於軍二十二年十月賜祭葬如典禮諡忠愍予世職騎都尉兼一雲騎尉以其子常安襲

### 陳福

陳福陝西榆林人先是居江寧父德明爲明榆林副將與流賊李自成戰歿於陣福葬之榆林遂家焉世祖章皇帝順治二年大兵定陝西福應募隸寧夏總兵劉芳名標下爲把總隨征叛賊賀珍武大定王元馬德等有功擢守備尋調隨都統李國翰剿滅趙榮貴王永強牛化麟高友才諸賊進征四川授遵義遊擊率兵攻克忠州賊寨擒斬僞總兵陳貴榮高鶴鳴等敘功加參將銜聖祖仁皇帝康熙二年隨四川總督李國英剿滅自成遺黨劉二虎郝搖旗李來亨袁宗第等於茅麓山加右都督銜尋擢成都副將署重慶總兵十二年召入覲賜鞍馬授寧夏總兵

時逆藩吳三桂反遣其黨王屏藩等犯四川四川提督鄭蛟麟總兵吳之茂皆叛應之福妻子在夔州爲賊所阻十三年蛟麟等以書誘福福執賊使遣其弟生員陳壽馳奏上嘉福忠貞予騎都尉世職授陳壽爲刑部主事未幾陝西提督王輔臣叛於寧羌據平涼固原道陳彭定邊副將朱龍皆以城叛福分飭所屬防剿疏陳其略諭獎以殫心籌畫十四年三月上諭部臣曰寧夏總兵官陳福效力巖疆勞績素著屢舉首逆札克篤忠貞且其妻子家屬現在蜀中逆賊挾誘福全無顧戀矢志不移深足嘉尙著陞補陝西提督仍暫駐寧夏管轄鎮兵其弟守備陳奇妻子亦陷賊中殊爲可憫著從優以參將陞用旋復以補舉首王屏藩逆札下部優敘晉爵三等男是時王輔臣陳彭朱龍受吳三桂總管巡撫總兵等僞職糾黨四出脅誘花馬池及惠安安定諸堡並爲所陷遂掠興武營福遣兵擊卻賊衆連復惠安安定諸堡自率兵圍花馬池擒斬僞都司王一龍等招降脅從之衆聞陳彭犯靈州遣遊擊熊飛擊之遁擒斬僞參將馬騰蛟等福率兵復甌坪安邊兩堡進圍定邊城掘壕築臺以困之先是朱龍不虞我軍至以僞副將倪光德守城而自出掠綏德至是知圍急引還福設伏沙家澗殲賊無算生擒朱龍城中人驚懼

逐倪光德出降福斬龍及光德以徇移檄招撫下馬關僞參將李訓縛僞總兵陳江詣軍門歸順陳江者初以海賊投誠授陝西督標副將經略莫洛攜以隨征王輔臣既害莫洛江從逆分踞下馬關福招之不應及是就縛乃數其罪而誅之旋偕副將秦必圖剿賊平遠所斬僞參將陳起元等復其城上嘉福勞績茂著優擢其弟壽爲鴻臚寺少卿福既復平遠所僭秦必圖乘勝剿賊直薄固原城圍之逾月王輔臣遣賊將自平涼來犯城中賊聞有外援亦突出抗拒副將賈從哲遊擊張元經卻走秦必圖戰歿於陣福收兵還靈州請旨斬從哲元經於軍旋奉詔以固原賊衆恃平涼之賊應援或先助貝勒洞鄂攻取平涼緩圖固原宜相機以行福奏固原有賊萬餘若我兵經趨平涼恐賊斷我餉道請先取固原以遏賊勢上允其請十二月福率寧夏兵征固原時王輔臣陳彭爲緩兵計潛分布奸黨虛張賊勢以搖惑我軍值歲暮冰雪寧夏兵不樂遠涉且以前此圍固原失利爲戒軍次惠安堡夜半衆呼譟欲劫福退師福出帳以大義曉諭猝遇害隨征諸將各收所部還本營事聞上命天津總兵趙良棟爲寧夏提督察其事廉知平羅營把總劉德倡議退師參將熊虎與其謀而營兵閩國賢陳進忠實戕害福四人並伏誅

諭嘉福爲國捐軀忠誠顯著擢其弟涿州參將陳奇爲天津總兵優贈福爲二等公賜祭葬如典禮諡忠愍以三等子爵予襲九次子世琳世勳久陷賊中復爲賊自夔州掠至遵義部議以陳壽之子世怡暫襲十九年陳壽自請隨大軍入蜀訪其家得之遵義攜至京命世琳襲爵入籍寧夏尋授直隸三屯營副將遷古北鎮總兵復遷鑾儀衛鑾儀使雍正八年以福入祀昭忠祠世琳卒子益襲官至雲南楚姚鎮總兵乾隆三十二年上念福致命疆場克紹義烈命予子爵襲次滿時再予恩騎尉世襲罔替益卒子大用襲任江南提督

傅宏烈

傅宏烈江西進賢人明末流寓廣西世祖章皇帝順治十四年兩廣總督王國光疏薦授廣東韶州府同知聖祖仁皇帝康熙二年遷甘肅慶陽府知府七年以訐告平西王吳三桂陰謀不軌革職逮繫論斬九年詔減辟徙梧州十二年冬吳三桂反廣西將軍孫延齡提督馬雄叛應之宏烈招集驍健陽附三桂受僞職爲信勝將軍而密約平南王尙可喜共圖恢復十六年正月遣人至贛州致書鎮南將軍覺羅舒恕言定南王女孔四貞不忘國恩孫延齡可招撫狀又致書督捕理事

官麻勒吉言大兵若速進南安宏烈從韶州策應則兩粵可定舒恕麻勒吉先後陳奏上嘉宏烈忠誠授廣西巡撫宏烈聞命疏言逆賊吳三桂陰險小人蓄謀不軌臣自康熙六年知之七年發覺其概審事諸臣惟恐激變凡涉三桂口供一字不錄臣憤激願死自認其罪蒙皇上特恩免死出獄安置嗣聞三桂反臣罪廢梧州計無可展廣西布政使李迎春梧州知府楊彥溶等降賊苦勸臣從臣憤不欲生自投江水願爲厲鬼殺賊漂流十里遇救不死仍赴梧州佇待一年因思不入虎穴焉得虎子乃投身賊地從中反間又假他事赴南寧遂入思州泗城廣南富川諸土司及交趾界聯絡義勇助平南王尙可喜軍可喜病篤猶執手相勸速復肇慶遂與其子之信合謀討賊擊敗僞將軍楊鎮邦僞總兵古元隆金朝相袁茂明等乃得由龍南達贛州歸命朝廷以展夙志吳三桂昨聞規復肇慶卽百計欲殺臣而終不得遂計者隨臣義勇五千人實賴其力請留爲援剿營進征廣西並請敕尙之信遣兵合剿上悉允所請加授撫蠻滅寇大將軍時宏烈已率兵擊敗賊衆於韶州擒斬僞總兵王雲龍僞遊擊何嘉會等遂進征廣西擊走僞將軍趙天元復梧州分遣總兵曾大熾參將周光裕李士龍等攻復昭平賀縣又招降鬱



林州博白北流陸川興業等縣賊衆復犯梧州宏烈遣總兵楊國泰等水陸夾擊陣斬僞總兵張元乘勝復潯州府遣平樂知府劉曉齋疏縷陳進剿機宜上諭吏兵二部曰將軍傅宏烈謀略優長忠貞夙篤自簡任以來實心爲國宣力邊疆親統官兵進取粵西恢復梧潯等處屢奏捷功勞績茂著今覽所奏進剿機宜籌畫詳密矢志滅賊攄忠效謀深可嘉尙著加太子太保所屬官員同心報國效力行間深爲勞苦各加職銜一級其代奏知府劉曉立有軍功諳悉形勢敷奏詳明亦屬可嘉著加參議道職銜方馬雄之甫叛也宏烈家屬百餘人盡陷賊中爲叛賊李迎春執送吳三桂與總兵楊國泰及諸將士家屬並遇害至是宏烈以聞諭獎其爲國忘家遇害家屬敕所司優卹時叛鎮馬雄踞柳州吳三桂諸賊分踞平樂南寧橫州勢猖甚宏烈欲借尙之信兵力共取平樂乘孫延齡已謀歸順赴桂林駐守屢請旨趣之信遣兵繼進之信以防守廣東爲說宏烈向借大礮及營馬皆弗應吳三桂知孫延齡不附己遣其從孫吳世琮與賊將馬寶李廷棟陶志貴趙天元擁賊數萬掠桂林給孫延齡出城殺之遂陷平樂伺宏烈赴南寧招撫土司襲梧州宏烈移師擊斬賊乃遁十七年二月與將軍莽依圖進圍平樂賊水陸拒

阻我兵失利退保中山鎮莽依圖奏宏烈所率兵先卻江水泛漲孤軍難以久留宏烈奏莽依圖所率兵不相應援仍自請議罪諭曰江水泛漲大軍不能相援賊衆我寡以致失利免議罪莽依圖與傅宏烈宜同心和協謀濟國事諭王大臣曰傅宏烈所領官兵從未支領俸餉奮勇收復諸路嗣以規定滇黔請發大軍並進因令莽依圖協力進取不意莽依圖既抵平樂借口綠旗兵失陷退至賀縣又言糧乏退保梧州以傅宏烈恢復如許城池盡棄與賊宜嚴飭痛改前非勉圖後效尋宏烈復奏守戰機宜奉諭曰覽所奏安人心固內地剿賊之策悉備佇看掃蕩逆氛以副倚任四月偕都統貝勒等率兵自北流陸川博白進剿斬賊將梁子玉等六月賊兵數萬渡左江我兵與戰失利退守藤縣十月賊併力來犯藤縣失守遂逼梧州十八年正月宏烈自梧州分布水陸官兵乘賊來犯木城時奮力夾擊槍礮矢石齊發殲賊二千餘遂遣總兵譚昇等收復藤縣進定平樂桂林五月疏言臣甫至桂林舊縣孫延齡部下甲兵請糧請餉呼告盈門其野性未化養之無益而又未可猝然解散宜仍立藩旗各色照額支餉以滿洲將軍帶甲兵一千駐省署理藩旗俟賊平後然後撤回京師至新自賊中來降諸將各帶兵馬若不用

之則其心生異且無以鼓勵將來若用之則名器太濫不成體制宜各照僞銜給  
劄令僞將軍赴部補用總兵副參遊及文職等官或願赴部或願在外將軍督撫  
軍前補用悉聽自便務令得所則各僞官解散矣臣暫留本標官兵以資彈壓俟  
投誠官兵安插妥當地方平定臣解組養母卽以臣標官兵交付滿洲將軍統轄  
酌量汰留總之天下久安長治之策要緊城池宜照江南陝西例設滿洲賢能將  
軍駐守以制反側文臣事權不宜太輕藩鎮兵權不宜太重趁此大兵在外軍威  
大振之日急應善爲布置密爲解散億萬年太平之基地也又言尙之信歸正後  
怙惡不悛前此臣與之交好隱忍調停欲導其爲朝廷出力未卽陳奏其在廣東  
賣官虐民抄家充餉遍地起稅恣行無忌時而疏請出兵湖南時而疏請平定廣  
西及至旨下則一兵不發閉門不出目中竟不知有君命臣因逆賊分犯梧州求  
其借用大礮不發求其援兵不發又因孫延齡請兵緊急求其借馬兵數百相助  
不發求其借空馬三百匹相助不來以致孫延齡全家受害廣西恢復遲誤至今  
臣不解其是何心也今年正月奉命特加大將軍進剿廣西值湖南大捷乘機可  
爲自應奮武前驅乃安駐封川不肯進兵日事狂飲臣不解其是何心也桂林官

兵歸正值逆賊四面屯聚城中絕食勢甚危急幸得征南將軍穆占自永州發兵接應賴以保全今之信行文僞將軍劉彥明等責其不應繳僞敕印劄於征南將軍臣不解其是何心也臣久知尙之信狂野性成反覆莫測故厚集兵力整飭水師以爲東西未雨之防今吳三桂已死餘孽蕩平在卽尙之信必無能爲但善後之策宜於肇慶設滿洲將軍或換滿洲總督帶領甲兵駐守彈壓削之信藩封散所屬多兵設水師提督以分其權則兩廣得以久安臣冒昧密陳乞留中採擇上並是其言以密疏示議政王大臣等酌行先是馬雄叛踞柳州病死其子承廕仍附吳三桂爲僞懷寧公廣西大將軍至是詭言投順宏烈以其隨降兵衆驕悍成習奏請仍以承廕統轄詔授承廕伯爵給昭義將軍印時賊將范齊韓等尙居粵西宏烈遣遊擊鄧林材合承廕兵剿擊復柳城融縣十月疏言進兵雲貴多屬山險之路非可專恃馬騎必用綠旗前驅而進兵之路廣西爲要湖南次之今兩廣綠旗肯爲朝廷捨命殺賊者惟臣標官兵願進剿雲貴朝聞命而夕行者亦惟臣標官兵逆賊未滅臣不安坐現乘此時天寒水涸遣臣標中軍參將溫紹賢等挑選精兵三千五百從小路往駐古泥相機進取貴州黎平府湖南靖州斷賊楓

木嶺糧道又調馬承蔭兵四千往慶遠以分賊勢臣專候兪旨卽親帶官兵或從慶遠泗城進發或從黎平靖州進發先奪楓木嶺會合湖南大兵努力前驅矢圖報稱詔如所請行十九年二月宏烈至柳州疏言柳州兵數不下三萬逆賊百端誘惑人心不一近以乏餉鼓噪臣欲擒誅首惡恐激衆生變又費兵力只得暫爲姑容大抵此股兵馬積成驕悍必俟殺盡邊界逆賊後設法陸續解散安置現在馬承蔭兩協五營乞敕盡給糧餉先收七千人心鼓勵前征庶不爲內地變患疏上未及報聞而宏烈已爲承蔭所紿登舟赴柳城會議潛伏賊黨刦之潰其營遂挾宏烈往九月至貴陽逆孽吳世璠誘以僞職宏烈罵賊不屈遂遇害十一月征南將軍穆占攻復貴陽收骸骨以聞上曰傅宏烈宣力粵西勞績茂著陷賊不屈捐軀殉難忠節可憫下所司優卹令由驛歸櫬贈太子太師蔭子入監賜祭葬如典禮諡忠毅並允廣西巡撫郝浴請建雙忠祠於桂林與前爲吳世璠所害之巡撫馬雄鎮並祀世宗憲皇帝時入祀昭忠祠子明垣由蔭生官知州

圖海

圖海滿洲正黃旗人姓馬佳氏父名穆哈達世居綏芬圖海初由筆帖式加員外



郎銜順治二年改國史院侍讀八年遷秘書院學士九年恩詔予騎都尉世職越歲授弘文院大學士列議政大臣十二年加太子太保命攝刑部尙書事明年考滿加少保十五年命同大學士巴哈納等校訂律例旋以承審江南考試作弊事遲延削加銜明年侍衛阿拉那與公額爾克戴青家奴毆於市刑部審理失實上詰問圖海不以實對下廷臣察議以其負恩溺職論死奉旨寬免削職十八年正月世祖龍馭上賓遺命起用聖祖仁皇帝御極卽於是年授正黃旗滿洲都統康熙二年七月蜀流賊郝搖旗劉體純李來亨等嘯聚湖廣鄖襄山中命爲定西將軍副靖西將軍都統穆里瑪率禁旅會楚蜀之師討之至則與總督李國英提督鄭蛟麟總兵俞奮起於大海署護軍統領根特等連營困之賊以兵三千犯奮起營圖海率兵邀擊敗之賊又連犯諸營各分兵夾擊咸潰敗未幾郝搖旗爲副都統杜敏擒斬於黃草坪劉體純相繼破滅惟李來亨擁衆據茅麓山恃險負固圖海等率兵圍之絕其聲援外則搜剿餘寇略盡賊勢窮蹙來亨闔門自經死僞公僞將軍以下僞官五百八十餘人兵八千八百餘名降執斬僞新樂王及僞官七人兵六千餘名俘其家口三千餘衆而還六年晉弘文院大學士加世職爲一等

輕車都尉會纂修世祖章皇帝實錄充總裁官七年命測儀象八年命錄刑部重囚並稱旨九年奏乞解機務專力戎行上慰留之十一年命清理刑獄十二年冬吳三桂叛十三年耿精忠亦叛聖祖以籌餉需才命攝戶部尙書十四年三月疏請敕禁外省軍需不得私派夫役不得先期拘集錢糧不得額外科斂詞訟重者速審速結小者不得濫准滋累衙蠹土豪不得魚肉善良奉旨允行是月察哈爾布爾尼刼其父阿安布柰以叛圖海奉命爲副將軍同撫遠大將軍信郡王鄂扎率師往討四月師次達祿布爾尼設伏山谷賊以兵三千人來拒我師我師進攻伏發撓我士默特兵圖海分兵迎擊賊以四百騎繼至力戰殲之布爾尼乃悉衆出用火器拒戰圖海令嚴陣以待賊敗復聚連擊大破之招撫人戶一千三百餘布爾尼僅以三十騎遁去時科爾沁額駙沙津以兵會剿遇布爾尼於扎魯特境追及斬之察哈爾平班師聖祖御南苑大紅門迎勞之敍功晉一等男十五年二月聖祖以貝勒洞鄂攻叛將王輔臣於平涼未克命圖海爲撫遠大將軍率護軍每佐領各二名赴陝總轄全省貝勒洞鄂以下咸聽節制三月至平涼明賞罰申約束軍威大振賊衆聞之懼諸將請乘勢攻城圖海曰仁義之師先招懷而後攻

伐吾奉天威討茲兇豎無慮不克顧念城中數十萬生靈無非朝廷赤子遭賊劫掠至此覆巢之下殺戮必多俟其向化歸誠以體聖主好生之德不更美乎城中軍民聞者莫不感泣咸思自拔以出賊勢由是日蹙五月奪虎山墩虎山墩者在平涼城北高數十仞賊首以精兵通西北餉道圖海曰此平涼之咽喉也得此則餉道絕城不攻而下矣卽率兵仰攻賊萬餘列火器以死拒戰圖海令兵番休迭進自已至午戰益奮斬僞總兵二人賊被殺及墜崖死者無算遂奪其墩據之俯視城中如在掌握因發大礮擊其城中營城中洵懼輔臣乃乞降隨以其情上聞詔赦輔臣罪撫慰之六月圖海筭授七品官周昌爲參議道齎詔入城翌日輔臣遣僞布政使龍榮遇等率士民獻軍民冊又遣其子繼正等繳所受吳逆僞敕印筭然猶疑懼觀望圖海復令周昌同其兄子前鋒侍衛保定往諭輔臣乃率衆薙髮降圖海令副都統吳丹入城撫定秋毫無所犯平涼被圍日久城中食盡加以鋒鏑之餘死亡過半因令地方官賑窮乏掩骼骼其老弱之轉徙不能歸者遣將士分送安插遠近帖然初周昌往招輔臣時言昌母孫氏殉節死願以身報國爲母請旌因請往至是奏旌其母又奏蠲秦省被兵及轉餉各州縣賦皆從之是月

遣振武將軍佛尼勒敗賊將吳之茂於牡丹園又敗之於西和縣北山將軍穆占進攻樂門敗賊於紅崖復禮縣於是僞巡撫陳彭慶陽僞總兵周養民嘉峪關僞總兵王好問關山僞副將孔蔭雄共率僞官九百餘員兵四萬八千餘名相繼降關隴悉平八月奉上諭圖海器識老成才猷練達贊襄機務宣力累朝以文武之長才兼忠愛之至性勞績茂著克副倚任朕心深爲嘉悅於軍功議敘外應從優加恩以示朕眷注忠勤酬答勲庸至意遂晉封三等公世襲罔替時漢中興安賊猶據守平涼慶陽初定人心未寧奏請分兵防守諸隘緩攻漢興別遣一旅赴湖廣會剿吳逆奉旨令圖海親率精銳以行圖海以陝西反側未安慮有變九月疏陳其狀聖祖因授穆占爲都統佩征南將軍印率師赴楚留圖海鎮守陝西十二月議取漢中興安奏調綠旗兵檄提督孫思克赴秦州趙良棟赴鳳翔以將軍侯張勇將軍王進寶各引兵助之期以明年正月二十日如所約至下張勇等會議以聞勇等謂宜視夏秋收穫豐歉再圖進取圖海以漢興山路險峻夏秋多霖潦賊守益堅請如前奏十六年正月議上上慮克復漢興後宜設重兵轉餉不易若視夏秋則頓師糜餉亦屬非計諭令守諸要隘分兵赴荊州會剿吳逆議遂寢三

月招撫韓城等縣僞總兵喬斌以下官百有餘員四月遣兵進逼禮縣益門先後  
敗賊於五盤山喬家山塘坊廟芭蕉園沙窩諸處復塔什堡是年九月賜服物並  
御製詩二章十七年二月奏請分兵兩路進取漢中興安旋奉密諭止之閏三月  
將軍佛尼勒等敗賊於牛頭山香泉四川總督周有德等敗賊於秦嶺復潼關堡  
五寨四月慶陽賊袁本秀受吳逆僞劄作亂圖海發慶陽宜君延安三營兵會王  
進寶兵討之斬本秀於衛遠溝餘衆潰散十二月疏請輕騎赴京面奏事宜許之  
十八年二月還陝五月賊犯棧道益門鎮各口奏請提督趙良棟進臨武寨相機  
而行俟擊破賊壘分道征進時湖廣廣西平聖祖諭亟殲寶雞之賊恢復漢興以  
平蜀地七月破益門鎮賊毀偏橋兵不能進疏其狀以聞聖祖以其怯懦易退嚴  
督之九月進取漢中興安分兵四路圖海親率將軍佛尼勒等由興安進總兵官  
程福亮爲後援駐守舊縣關諸路將軍畢力克圖提督孫思克等由略陽進總兵  
官朱衣客爲後援駐守西河諸路將軍王進寶總兵官費雅達等由棧道進總兵  
官高孟爲後援駐守寶雞提督趙良棟由徽縣進剋日並發十月圖海師次鎮安  
縣分兵爲二隊進攻僞總兵王遇隆於火神崖敗之渡乾玉河奪梁河關僞將軍



韓晉卿遁入四川是月王進寶復漢中趙良棟復徽縣略陽畢力克圖復成縣又復階州降僞副將王光生以下官十九員兵三百二十名十一月復興安降僞將軍謝四僞總兵王永世以下官三百八十二員兵萬四千三百餘名平利紫陽石泉漢陰洵陽白河及湖廣竹山竹谿上津等縣皆下之是月畢力克圖遣參將康調元復文縣僞洮岷道王文衡降先是王進寶趙良棟捷音先至聖祖以圖海畢力克圖等遲緩切責之至是捷聞得旨嘉獎下部議其功尋命率大軍之半駐守鳳翔十九年正月命赴漢中轉餉以濟蜀師九月陝西總督哈占由保寧直上擊賊譚宏命發兵爲聲援以分賊勢是月獲奸民楊起隆初起隆於康熙十二年詐稱爲朱三太子謀作亂於京師正黃旗周公直家奴陳益聚衆十人於家將起應之公直首其事圖海卽率兵圍之陳益等悉就縛至是并獲起隆送京師二十年正月賊犯四川敘州諸處調副都統翁愛率所部兵往援復奏請親行諭仍駐漢中防守秦蜀七月以疾還京尋具疏乞休聖祖慰留之十二月卒累官至太子太傅中和殿大學士兼吏部尙書正黃旗都統封三等公世襲諡文襄賜祭葬如典禮明年太宗文皇帝實錄告成以圖海曾充監修總裁官追贈少保仍兼太子太

傅二十二年御製碑文立石墓道雍正二年加贈一等忠達公配享太廟尋命建專祠復御製文刻石以旌之崇祀陝西名宦祠子諾敏襲爵

### 李之芳

李之芳山東武定人順治四年進士授金華府推官十一年以卓異內陞刑部主事遷本部員外郎郎中十五年九月授廣西道御史十一月疏言各省錢糧定例官收官解乃各州縣私僉大戶承值民間畏懼如赴湯蹈火百計營脫官吏贖貨免此僉彼鄉愚不諳倩人頂充因有棍徒包攬將在官銀米任意花銷仍累原僉里戶賠償小民膏血有限不堪一剝再削雖加筭筆終無所得故各省侵欠錢糧爲數甚多追補還官者十常不得一二總緣陋規相仍名色不一有司視爲故常耳苟且欺蒙將何底止乞敕各撫按力行整頓察革陋規凡州縣徵收銀米槩令佐貳官彙解遇有借端科索者許佐貳官揭報州縣州縣轉報撫按提問治罪揭報之佐貳官酌加獎勵如撫按釐剔無效州縣奉行不力並嚴議處分疏入得旨私僉民解病民殊甚下部議如所請行又言州縣路當孔道迎送往來自朝至暮有曠官守請嚴飭禁止從之十六年六月疏劾兩廣總督李棲鳳以失守城池革

職道員郭光祖委署左江道以徇私縱罪革職推官季奕聲復原任應察議上命棲鳳回奏自以不能詳察引咎下部議處如例十七年巡按山西十八年聖祖仁皇帝御極裁巡按回原任康熙元年請假歸二年八月補湖廣道御史三年十二月疏言邇來叩闈事情干涉民間冤抑者固自不乏然而健訟刁告之輩砌款行私降級革職之官飾詞巧辯滋煩擾而長欺妄莫此爲甚嗣後審問情虛宜各依律究擬勿止以責贖從輕發落其審虛復行叩闈仍審虛者加等治罪庶刁誑息而體統肅疏下部議行五年巡視浙江鹽政七年掌京畿道事尋掌河南道事八年五月內大臣鼐拜獲罪拘禁大學士班布爾善以結黨行私伏誅之芳疏言近者班布爾善任意票擬已置大法自此政本肅然一清矣臣惟票擬爲政本所繫昔時大學士等俱內直諸司章奏卽日票擬世祖章皇帝面賜裁決立法至善自順治十八年以後惟輔政大臣內直大學士等在外疏奏俱至次日看詳及進呈候旨止有學士而大學士不預非所以昭嚴密請仍復舊例內直看詳卽日票擬公同候旨永杜任意更改之弊疏下部從之又疏言世祖章皇帝時賞罰出於至公其時之督撫不敢恣睢無忌率有司以虐窮民然猶不時甄別處分以防其壞

法害政之漸輕則降革重則提拏斧鉞懍然未嘗少貸故當時吏治肅清民生不困豈一時之督撫皆賢彼誠有所畏也自順治十八年以後督撫率多夤緣而得有所恃以無恐勒索屬員擾害百姓以下僚爲奴隸任傳宣爲爪牙橫取財物賄賂權奸根深蒂固惟其意所欲爲夫直省億萬之衆皆世祖章皇帝留遺之羣黎皆我皇上愛養之赤子其能堪此輩朘削爲也自與受同罪之法嚴無敢糾督撫之貪婪者與者不認則言者涉虛卽確然有據亦不能執其人而問之矣豈但不能糾督撫且不敢糾司道守令糾之則于礙督撫安有督撫承問而不力爲脫卸謂盡屬子虛者數年以來未嘗因貪縱而重處一人反得粉飾功次冒濫加銜有貪之利無貪之害彼又何憚而不怙惡以自恣耶近者皇上親政屢頒諭嚴飭亦不過糾一二有司以謝責夫表不正則影不直安足除貪盜風而甦民生乎乞睿鑒親裁罷黜溺職督撫庶吏治漸有起色疏下部知之尋甄別各省督撫罷黜降用休致數人九年五月疏劾大學士魏裔介前以候補左都御史妄援恩詔廕其子魏嘉及入內院市恩徇私諸款詔裔介回奏仍下部察議以各款俱辯釋惟候補官無得廕之例革魏嘉廕生事詳魏裔介傳八月得旨內陞以四品頂帶食俸

仍任御史十一年二月擢左副都御史六月疏言外官失察衙役犯贓例坐革職在內部院司官所管胥役犯贓向未有失察處分故縱容奸蠹置若罔聞請敕部嚴議俾知懲警又疏言今日吏治之弊在於文法太密而尤密者在於方面有司等官常有在任三兩年而罰俸至二三十年者夫俸薄尙恐不足以養廉況積年無俸又安能責其潔己愛民乞敕部酌覈外官罰俸事由原無情弊近來處分過當者請旨仍遵世祖章皇帝時定例除去繁苛以課吏治之實效又疏言兩淮兩浙長蘆河東等處鹽課專遣御史經理爲商人培一時之元氣卽爲朝廷培恆足之泉源緝梟販以疏官引嚴秤掣以速行銷翦惡棍以安良善察職要以便小民皆巡鹽御史職掌在順治十八年以前原以此爲殿最之法不僅以完課爲能事乞敕嗣後各巡鹽期滿仍行昔日考覈之例戶部據錢糧之完欠爲高下都察院據政績之優劣爲勸懲庶各爭自濯磨克盡職掌矣疏並下所司議行是月浙江巡鹽御史杭奇常錫允以私派詐贓爲商人赴通政司控告命之芳赴浙察審得實杭奇常錫允並論絞十月遷吏部右侍郎十二年六月授浙江總督明年三月疏言逆藩吳三桂陷湖南恐煽誘滋擾浙江提督標兵應復前未裁減時原額令



各營使用槍礮爲攻堅擊遠計疏甫入逆藩耿精忠執福建總督范承謨據福州反之芳聞變疏言賊兵已至蒲城衢屬仙霞關與賊接境而常山一縣又爲西南孔道臣已分調官兵星馳守禦請急敕江南省調兵赴援江西省調兵謹守玉山鉛山要路以固封疆疏入命都統賴塔率江寧副都統瑪哈達瑚圖等及駐防兵赴浙江諭令與之芳商決軍務五月奉詔進駐衢州請復降調總兵李榮原官俾統領綠營副將王廷梅牟大寅陳世凱鮑虎等分道禦賊賊由常山陷開化壽昌淳安由處州犯義烏浦江東陽湯溪龍游沿河阻絕餉道聯結叛弁司定猷叛鎮祖宏勳陷平陽踞温州又陷黃巖犯台州及紹興集悍卒數萬窺衢州七月之芳與賴塔閱兵於水亭門率總兵李榮及副都統瑚圖等兵直薄賊壘軍於陜西賊悉衆來犯我兵衝冒礮矢奮擊卻賊賊越壕踞木城我兵追擊至壕守備梁安歿於陣賊乘夜移踞杜澤大洲陳世凱與副都統沃申進剿斬戮甚衆乘勝復義烏湯溪牟大寅破賊常山遊擊王世萬破賊龍游鮑虎復壽昌王廷梅敗賊於金華之石梁大溝源李榮復東陽尋大敗賊兵於金華之壽溪斬僞總兵張元兆等毀寨十八參將洪起元敗賊於紹興復嵎縣先後得旨嘉之芳調度有方將士奮勇

令事平日議敘時大將軍康親王傑書自京統師至金華分遣貝子傅拉塔與都統巴雅爾等剿賊温台賊之在處州者逼衢州東南在江山者逼衢州西南之芳分飭營伍嚴守禦勿遽迎擊十月疏言臣自駐衢以來率勵將士搜剿雖所至克捷終因兵少戰守不能兼應原調集之兵及新設援剿鎮兵共祇數千金華堵禦温處兩路嚴州接連徽饒二郡並屬咽喉之地而衢州又當衝扼要爲全浙門戶各處賊兵皆報稱數萬每處官兵不及三千派防屬縣駐守府城聞警策應常恐不敷臣標現設三營應增足每營一千之數並增設前後二營合成五千兵目前便於策應有恢復之地即可分撥駐守俟事平之日調作温處各營原額自是增兵不踰經制之外而援剿機宜克協矣疏下戶兵二部議行會康親王奏進征温處應設温州黃巖平陽三鎮標營其將弁聽之芳揀補陳世凱王廷梅鮑虎並擢總兵官十一月賊衆五萬由常山逼衢州城西溝溪倚山結十數寨掘壕塹覬聯南路賊巢之芳與賴塔議出賊不意遣王廷梅同參領禪布等夜趨溝溪分隊進攻自辰至酉合力撲剿斬賊萬餘賊將棄寨潰竄追逐二十里獲巨礮器械甚多十四年二月疏言臣統師衢郡日夕對壘凡籌畫戰守接濟芻糧策應調遣時刻

勿違軍機緊要之事萬不能輟更無暇晷翰理盜案且臬司駐劄省會解審既慮疎虞駁覈又恐遲滯乞敕歸撫臣就近覆審徑行題結又疏言凡城鄉盜案專汛兼轄武職有任俸罰俸降級之例所以責其督緝逸盜也今用兵之際或本汛防剿或調遣隨征業已披堅執銳展績封疆不能分身緝盜俸銀停支情屬堪憫宜破格開復以示恩養將士之心又疏言金衢台嚴紹等處賊寇屢經征剿附從烏合之徒漸已解散仍復故業臣飭所在官吏安集撫綏俾投誠衆多惟賊寇蹂躪之地一望蕭條啼號載路卽如衢州近城難民現有九千七百餘口其散處各鄉者尙不可計數臣與府縣官雖捐貲量給不過涓滴之微請於布政司所收捐助軍需內動支散給皆疏下部議並從之時賊帥馬九玉朱懷德等盤踞江山常山開化三縣於溪口清湖大溪灘茅村東南列賊營四又列營前嶺以聯絡東南各賊巢且散布處州金華山谷四出窺犯李榮陳世凱王廷梅等分路搜剿所至大捷五月之芳與賴塔議乘連旬大雨河水泛漲由南塘搗賊前嶺陣斬七百餘級墜崖落水死者無算十五年三月遣將由遂安截賊後路連破賊寨復開化縣疏言衢州控賊要害滿漢官兵擐甲枕戈已逾二年因浙省處處用兵分布各路以

致兵力不敷前此專望一處掃平便可併力攻取直搗仙霞不意各路寇氛雖屢經剿創尙未撲滅江西廣東各逆又出沒常山開化欲與馬九玉賊營聯合在衢滿漢官兵僅能堵禦若欲急圖滅賊非厚集兵力不可目下賊勢斷不能窺犯江南宜酌調松江崇明提標兵五六十赴浙聽大將軍康親王調度并力進剿疏入上命康親王於浙省分駐兵酌調統率諭之芳議定由何路進剿之芳疏言自耿精忠叛變分遣賊衆一由衢州一由温州一由處州三路入犯兼以海洋賊舟往來牽制而且廣布僞筭煽惑人心不逞之徒所在蜂起官兵各路堵禦屢奏捷功而負固抗逆者尙有温州之曾養性祖宏勳處州之連登雲徐尙朝沿海出沒之熊進學等因衢州向爲八閩大路勁卒畢集今必先由衢進擊殲其精銳則諸路之賊自然瓦解逆賊馬九玉朱懷德等現在深溝高壘死守河西然其南則江山西則常山皆可以間道截其糧運斷其歸路我兵一進使賊首尾受敵勢難仍保巢穴從此八閩可奏蕩平矣疏入從之八月康親王抵衢州與之芳及賴塔議先斷賊餉道以奪河西賊勢遂進兵大溪灘復江山縣馬九玉棄營遁之芳遣副將馬化龍參將閻進趙得壽率兵隨賴塔進剿降僞參將金應虎等克仙霞關康親

王進定建寧延平將至福州耿精忠率衆降賊之在温州處州者悉解散僞總兵馬鵬汪文生陳山僞將軍程鳳等猶分踞江西之玉山鉛山弋陽德興等縣之芳奏請會剿得旨俞允而江西兵方以禦吳三桂逆黨於吉安袁州不遑東顧之芳遣兵一由常山進剿玉山一由開化進剿德興十月攻克玉山城汪文生潛遁十一月破賊木城六自白沙關趨德興連克賊寨十有三擒馬鵬械至衢州斬以徇遊擊郭守金等復鉛山興安弋陽貴溪等城上嘉之芳遣兵剿賊隣省恢復城邑調度有方下部議敘加兵部尙書銜十六年四月遣參將蔣懋勳等剿賊於玉山之椒巖洞僞總兵陳山率衆出降先是馬鵬就擒汪文生程鳳俱乞降俄程鳳病死其妻王玉貞以僞揚烈將軍印籍所屬六萬七千餘人就撫而僞總兵林爾瞻擁衆數萬以鉛山上饒與福建光澤縣錯壤之石壠地爲巢穴恃山險崎嶇招之弗出之芳令蔣懋勳等由鉛山進剿分扼要隘率數騎入寨慰撫乃挈僞官百餘兵二萬餘出降別有僞都督李日生僞提督洪成龍分距玉山之八仙洞老鼠洞出掠子午口十七年三月蔣懋勳等擊賊子午口斬級數百之芳復遣參將閻進會剿克八仙洞復克老鼠洞各斬賊千餘毀平賊寨時海賊鄭錦尙踞閩境設五



鎮其僞總統劉國軒朱天貴等糾集賊衆乘船窺伺瀕海郡邑之芳櫛各營汛嚴密守禦象山副將汪國祥等敗賊於廟嶺湖邊賊復犯温州各汛地皆有備擊毀賊船溺死者甚衆僞副將詹天樞殺賊將麥仁赴總兵陳世凱軍前歸順十八年十二月令定海總兵牟大寅率兵巡海見島嶼而木城草屋者悉焚毀搜斬又令遊擊衛聖疇等更番出哨遇賊孝順洋斬僞參將童耀等及賊兵三千餘毀沈十九船獲十五船並器械僞印筭以還二十年七月疏言浙省上游險要莫重於衢州而衢之恃爲咽喉門戶者莫重於仙霞一關自康熙九年撥舊駐江山之楓嶺營歸閩省總兵官於浙不相統轄迨閩中變亂致仙霞天險反爲賊踞聲息不通寇兵遂得深入仰賴天威掃蕩恢復以浙省官兵駐守近見福建總督姚啟聖請設楓嶺營隸閩省伏思守關之法應從內以控扼於外未有反借外以遙制乎內者宜設左右兩營左軍守備以下閩省支餉右軍守備以下浙省支餉其楓嶺營遊擊兼聽兩省節制仍於浙省支餉疏下部議從之二十一年八月奉詔還駐杭州十一月召入京爲兵部尙書二十三年八月調吏部十一月諭大學士等曰部院大臣年高者借以料理政事不以筋力爲禮兵部尙書李之芳齎捧木匣以衣

裘厚重偶致失足倫或至損傷朕心深爲不忍以後木匣令尙書侍郎內年少壯者捧進二十四年八月以疾乞休得旨慰留十二月戶部議刪錢糧絲忽以下細數重刊簡明賦役全書給事中楊周憲疏陳細數不應盡刪全書不應重刊下九卿科道再議未決召詢之芳奏言戶部初議絲歸於毫今擬絲以上之數仍存忽以下之數刪去則便於稽覈吏胥不得作弊實有益於民上是之議遂定二十五年二月彙敘任總督時軍功予雲騎尉世職准襲一次二十六年九月授文華殿大學士二十七年二月御史郭琇疏劾大學士明珠余國柱結黨營私事謂內閣票擬俱由明珠指麾輕任意余國柱承其風旨卽有舛錯同官莫敢駁正上旣罷明珠余國柱大學士勒德洪並命之芳休致回籍明年上南巡之芳迎駕於德州賜賚優渥三十三年十一月卒於家年七十有三諭曰李之芳前爲浙江總督時隨大軍進剿歷有勞績簡任機務勤慎素著忽聞在籍溘逝朕心深切軫惻下部議卹賜祭葬如例諡曰文襄子鍾麟襲雲騎尉世職四十九年八月諭大學士等曰凡人能效命者卽爲勇士耿逆叛時李之芳任浙江總督雖不諳騎射執刀立於船首率衆突前大破敵人以立功績彼時同出征者回京俱稱李之芳之勇

今承平日久善於馬步射能管轄兵丁者尙不乏人若屢經行陣之人甚難得也世宗憲皇帝雍正十年入祀賢良祠乾隆三十二年上追念國初以來宣力效忠之臣命部臣稽覈前此曾授世職襲次已滿者疏列具奏之芳裔得旨予恩騎尉世襲罔替